

密縣志

卷十五
循政志

卷十六
人物志

密縣志卷十五

循政志

漢

卓茂 後漢書本傳字子康南陽宛人也父祖皆至郡守茂元帝時學於長安事博士
江生習詩禮及歷算究極師法稱爲通儒性寬仁恭愛鄉黨故舊雖行能與茂不同
而皆愛慕欣欣焉初辟丞相府史事孔光光稱爲長者時常出行有人認其馬茂問
曰子亡馬幾何時對曰月餘日矣茂有馬數年心知其謬默解與之挽車上顧曰若
非公馬幸至丞相府歸我他日馬主得亡者乃詣府送馬叩頭謝之茂性不好爭如
此後以儒術舉爲侍郎給事黃門遷密令勞心諄諄視人如子舉善而教口無惡言
吏人親愛而不忍欺之人嘗有言部亭長受其米肉遺者茂辟左右問之曰亭長爲



從汝求乎爲汝有事囑之而受乎將平居自以恩義遺之乎人曰往遺之耳茂曰遺之而受何故言耶人曰竊聞賢明之君使人不畏吏吏不取人今我畏吏是以遺之吏既卒受故來言耳茂曰汝爲弊人矣凡人所貴於禽獸者以有仁愛知相敬事也今鄰里長老尙致饋遺此乃人道所以相親况吏與民乎吏顧不當乘威力強請求耳凡人之生羣居雜處故有經紀禮義以相交汝獨不欲修之寧能高飛遠走不在人間耶亭長素善吏歲時遺之禮也人曰苟如此律何故禁之茂笑曰律設大法禮順人情今我以禮教汝汝必無怨惡以律治汝何所措其手足乎一門之內小者可論大者可殺也且歸念之於是人納其訓吏懷其恩初茂到縣有所廢置吏人笑之鄰城聞者皆嗤其不能河南郡爲置守令茂不爲嫌理事自若數年教化大行道不失遺平帝時天下大蝗河南二十餘縣皆被其災獨不入密縣界督郵言之太守

不信自出按行見乃服焉是時王莽秉政置大司農六部丞勸課農桑遷茂爲京部丞密人老少皆涕泣隨送及莽居攝以病免歸郡常爲門下掾祭酒不肯作職吏更始立以茂爲侍中祭酒從至長安知更始政亂以年老乞骸骨歸時光武初卽位先訪求茂茂詣河南謁見乃下詔曰前密令卓茂束身自修執節淳固誠能爲人所不能爲夫名冠天下當受天下重賞故武王誅紂封比干之墓表商容之間今以茂爲太傅封褒德侯食邑二千戶賜几杖車馬衣一襲絮五百觔復以茂長子戎爲大中大夫次子崇爲中郎給事黃門建武四年薨賜棺槨塚地車駕素服親臨送葬子崇嗣徙封泛鄉侯官至大司農崇卒子參嗣參卒子訢嗣訢卒子隆嗣永元十五年隆卒無子國除初茂與同縣孔休陳留蔡勳安重劉宣楚國龔勝上黨鮑宣六人同志不仕王莽並名重當時論曰建武之初雄豪方擾號呼者連響嬰城者相望斯固倥

惚不暇給之日卓茂漸漸小宰無它庸能時已七十餘矣而首加聘命優辭重禮其與周燕之君表閭立館何異哉於是蘊憤歸道之賓越關阻捐宗族以排金門者衆矣夫厚性寬中近於仁犯而不校鄰於怨率斯道也怨悔曷其至乎

索長官 不知何代人舊傳虎入境噬孀婦王氏子婦具訴長官遣役執牒追之役懼不敢近投牒徑中虎銜牒跪廷下如伏罪狀長官曰能養婦如子可免虎頷謝自是日銜一獸以報婦婦死乃出境

元

明格公 元族也至元元年爲達魯花赤勸農興學歲旱虔禱大雨立沛蝗自北來祀之即去民勒碑記其事

杜君美 至大庚戌令密年已七十矣容觀精力不衰謹愿勤練以善化民三年如一

士民德之

明

葉 預 明敏果斷蒞下有威強橫懾服閭左蒙庥

陳 綱 剛介公廉吏民事如神明不敢犯至今思之

侯一位 字制卿隆慶庚午蒞密令行禁止吏畏民懷西北山有虎鄉人雷自強斃焉
一位禱於神甫二日勇士趙龍等即擒以獻生員劉賢有擒虎安民記

劉繼祖 萬歷間以開封知事來攝時民多逃賦他竄爲蠲逋負給牛種以招之值旱
蝗虔禱立雨歲乃有秋西邢保蔡大崧爲豪強所誣陷大辟雪其寃見靳司空於中
重建劉太公生祠碑記

張祖范 奉委丈地均糧早作夜思擁派極均民皆悅服見南台寺碑記

王時英 萬歷間令密勤撫字平獄訟未二年百廢俱舉密人德之

儲應爵 宰密半禩百度修舉乙未夏旱一再禱於黑龍池甘霖立沛四野霑足見黑

龍池禱雨記

劉肅清 愛士民勵風化葺宮牆繕雉堞折獄得情不輕加撲責善政甚著見西十里亭去思碑

苗之廷 崇正八年正月流寇薄城之廷率衆禦之堞牆不及肩守者露身之廷奮力殺賊賊乃退是時與長葛鄆城葉縣諸令皆有殺賊威名見綏寇紀畧

朱敏汗 明史作敏汀時連歲荒歉人相食有父子夫婦忍啖不忌者敏汗拊膺流涕繪流民圖奏之懷宗特爲蠲免正賦民困以甦崇禎十四年春闖寇陷城死之

明史忠義傳崇禎十四年正月賊陷密縣知縣朱敏汀及里居太僕卿魏持衡舉人

馬體健死之敏汀妾張一女一孫及臧獲數人俱死贈僉事

袁繼善 繼善爲尉仁厚精明盜賊屏息邑北八里之雷山忽有狼爲害居民奔告繼

善詣山口廟禱而捕之即日獲狼共詫爲神見邑尉袁公龜狼記

岳士瞻 教諭密縣崇禎十四年城破與知縣朱敏汗殉難

清

崔養重 順治二年冒險蒞任修葺城門建設堞口扞蔽內外勸民入城覆草爲廬以

民寥寥數十家招來流亡一百七十戶

任文煜 順治二年通判開封府流寇張成擾密文煜撫降之驅除餘寇境內以安遂

署密事後改湖廣常德通判遷九江同知十六年寄籍於密長子覺知以武舉授守

備銜隨征吳逆有功候補都司

李芝蘭 字毓秀順治五年令密當闖寇蹂躪之後民盡流亡田賦不充大吏以勸墾多寡爲有司殿最前任虛報田有四百餘頃芝蘭念民大困勸課三年以足前報之數雖奉檄嚴催受罰不辭終不續報又錢糧櫃頭闢布浮費官馬喂養民運漕米最爲重累芝蘭一一革之明季秕政至此殆盡除矣平西王家屬西遷烏金王北還檄催協濟急如星火民皆蹙額芝蘭詣鄭州備供應一切不以擾民兵燹初定官署祠廟蕩爲瓦礫集鎮邱墟商旅不行芝蘭多方勞徠入城者至五百餘家大隗牛兒兩鎮設法勸民造房招商貿易復通鄉城漸有起色而白骨青燐哀聲夜號民間驚擾遂置地鑿二十塚俾每保各占其一捐俸募工掩骼埋胔建醮超懺冤號頓息人民安堵邑志燬於兵火暇則同邑舉人韓繼文徵文考獻廣爲搜羅筆削維嚴旱乾霖滂齋沐步禱如響斯應羣狼入城噬人具牒城隍廟患頓息皆政之卓然可傳者

李居易 字嵩友端方樂易愛民如子時時詢民疾苦稍有不便即除之自奉儉約非
客至不肉食常賃趨化民地數畝種蔬自給有林宗剪韭之風暇則策蹇出遊遇農
言耕遇士講學刻家禮以教密人後以從孫徵君遊引疾去

張充先 字還初禹州州判康熙七年攝縣事下車後凡舊規不便於民者盡革之迨
罷任布被蕭條僕馬二人而已

張博 字厚子慈祥樂易士民如坐春風時漕米貼解繁費爲苦條上不允公堅持
不可回上憲爲罷之有強項名後以終養致仕密人攀轅臥轍雲集車下踰月始得
行

衷鯤化 勤於民事修廢舉墜具有成功
袁良怡 續纂邑乘修廢舉墜有功斯土

許履坦 廉明仁恕密邑辦糧定例加一四徵解履坦慨然曰凡作官者寬一分則民受一分之賜遂出示加一二徵民食其德者數年有構訟者輒反覆勸諭或經月不答一人不得已用刑輒歛噓久之卸事後囊無餘資虧穀二百餘石密人聞之肩挑背負爭相代償不數日而足有西山民駝穀數斗至履坦以穀足辭其人愧無以伸意傾之館門而去去之日老幼男婦載酒泣送終日不能出郭東行四十里有藍縷老婦攜稚子以酒果跪進曰好老爺乞飲貧婦一杯酒履坦凄然受之士民至今感頌云

姚士圭 字蒔鹿超化一帶有猛虎出沒鄉民驚恐頗妨耕作公爲文虔告城隍及土地且出示懸賞募鄉勇擒捕閱數日鄉人來報曰虎已去矣夏大旱禱於風雨壇翌日雷電交作得微雨三次復禱於南山白龍廟以鉄牌書雲輪咒列銜鈴印繫虎頭

骨縫湫底越三日兩得澍雨四境霑足公賦詩以記其事士民感其德於卓君廟東
建祠以祀

高其哲 嚴明果決入境即私訪一切利弊與奸吏惡棍到任釐剔一清奸宄斂跡邑
中大治

江 湄 乾隆十四年署任辦大差民不滋擾密人德之

秦 勤 潔己愛民嘗以密東數保距城稍遠令於曲梁設廠收糶令民執斛自量留
心文教續修邑乘去任後掌教書院數載多所成就

陳天階 政尚仁恕優禮學者人多思之

柴孝嗣 慈祥樂易愛民如子政之所施利無不興害無不除乾隆四十七年睢工決
口工甚鉅密派物料二十餘萬孝嗣念土瘠民貧力求蠲免再三乃允及卒士民奔

赴哀吊後數年其子過密猶矐金數百以贈感前德也

邱景雲 改建書院振興學校密之文風自此漸變至今士子猶感其作養云

楊泰起 令密十餘載廉靜不擾革除支號驟頭一事民尤被其惠以上舊志

景 綸 字春樵剛正廉明遇事立斷嘉慶癸酉歲大饑籌集巨款城鄉均設粥廠又不時嘗飯以杜弊端所全活者甚衆黃河馬營口決河督檄密出料助工公以密不產料具文再三申詳物料之役遂永遠豁免

楊炳堃 字蕉雨勤政愛民知無不爲開洧水渠十五道歲可得穀數千石至今民賴其利又熱心興學勸民捐田贖金籌設義塾三十處貧寒子弟得沐教育之恩

王麟定 字仁庵學問淵博善屬文熱心課士文字親爲筆削密縣文風爲之大振時旱蝗爲災率民驅逐酷暑不避又收買蝗子務絕遺種去任數十年父老猶傳頌之

張廷璽 方嚴疾惡不畏強禦蒞任初值歲饑多盜嚴行緝捕奸宄斂跡民賴以安
邊淪慈 性慈善斷案非萬不得已不用鞭朴天旱禱雨跣行數十里甘霖立霑旋去
任卒密人聞之咸爲泣下

張錫圭 字桓生洞悉民情斷案明決嘗捐俸買書數十種儲藏檜陽書院以餉士子
時賓興久廢特爲規復自是科第不絕在任時麥秀雙歧咸稱頌之

姚晟年 字少劬學有根底下筆千言立就聽斷明敏案無留牘又復遇事敢任曲梁
鉄佛寺窩匪近數百人率警親往擊散民國二年匪踞風后頂勢甚猖獗約禹新會
勦斃匪無遺又白匪餘黨丁保成等据蒼萃山四處劫掠星夜督隊環攻匪遂蕩平
當鼎革時人心浮動盜賊蠶起鄰境多被蹂躪而密卒無恙

四

三

二

一

一

密縣志卷十六

人物志

忠烈

漢

常十 古碑云密人世傳漢光武遭王莽之難常氏十人匿之莽圍之急兄弟謀代死其最少者爲常十曰我貌頗類斬我首獻之可免也如言圍解光武即位爲立報恩寺並營其墓後九人皆列葬其旁或云牛店東北有補君十代之墓迤邐相及各成一尊之勢今其地仍名補坡疑爲補君墓云

明

郭光斗 流寇破城挺身殺賊勢急自刎妻鄭亦縊以殉

魏登科 通江典史追賊二百里外歿於陣撫按題請立祠

魏持衡 光祿寺卿兼鴻臚寺事明史忠義傳作太僕卿崇禎十四年里居城破殉難

馬體健 字天行舉人闖賊圍密城中食盡體健捐貲贍士城破被執與子驥俱不屈

死見明史忠義傳

王家徵 性英毅值流寇渡河年方十七糾合鄰族築寨堅守以寡擊衆出奇制勝保

障一方寇不敢犯崇禎壬午冬以守城功授守備銜甲申正月聞寇犯京師忠憤激

烈約舉義旗勤王怒氣冲肝嘔血而死時年二十七

陳 珙 闖賊陷密死於難

馮昌期 舉人城破墮南城下死於馮氏祖塋

傅興朝 闖賊犯密率鄉勇守南城城陷死於壕

以上見舊志

清

張志周 字復夢以舉人大挑一等歷任江南邳州牧豐縣令所在有惠政以清廉著
洪楊之亂賊薄豐城志周竭力守禦城陷具衣冠投水死豐人思其德請於朝建專
祠祀之旋奉旨入京師昭忠祠廕雲騎尉世職光緒間入本邑鄉賢祠子汝梅見政
事門

王運增 善拳技負氣節擒匪擾密圍其村與兄運芳共出擊賊自辰至酉殺傷甚衆
以衆寡不敵竟過害杜縣尹聞於上詔卹之

白景中 張鵬翎 丁百超 三人皆習鎗棒有勇力擒匪猝至率徒數十人與之抗
拒賊四面蹙之俱死於難

李正材 擒匪陳太安等竄密聞賊至同嫂姪出走遇賊於白石坡嫂被戕與姪興裕

皆奮鬪同死於難

王會印 監生賊至率衆擊賊自辰至午殺賊數十名力盡被縛罵不絕口備受慘毒
割舌抽腸而死

鄭祖康 增生禦賊不勝被執賊劊其目拉二里許至坡寨罵愈厲見殺

張永興 鄉團長率鄉團擊賊陣亡

張元仁 鄉團長擊賊被戕

鮑國興 鄉團長率鄉團擊賊被縛罵賊賊投之火中焚死子書柄書柱奮力殺賊數
名賊怒殺其全家十口孫升同日慘死

張法 鄉團長偕弟修率衆擊賊同死於難

張池 擊賊不勝恨罵被殺

孟聚財 鄉團勇戰賊於西樊溝陣亡

王化隆 在王堂溝擊賊被殺

楊永齡 不爲賊屈烈火焚死

李天安 罵賊被戕子東峯先負母逃聞父死置母於李家溝出尋父屍遇賊大罵力
鬪而死

陳元清 時年七十一賊至罵不屈被重傷死孫心廣護祖母暨叔祖母逃至大潭溝
遇賊隻身格鬪並死於難

楊永清 賊至全家不避大罵不屈賊怒填入洞中焚死子萬銳孫同慶三世五口同
遇害

呂廷模 在白草岡罵賊被戕時年七十二子庚昌憤與賊鬪登時身死

龍書升 在灰穴溝擊賊陣亡

馮春田 聞賊至負母逃遇賊被虜脅使從春田乞放母還越日自刎死

崔永貴 在轉古腦擊賊被殺

王文燦 在尙王溝擊賊被殺

鄭以寬 儒童賊至守護祖母罵賊不屈賊縱火焚死弟心武同撲火死

劉清蘭 監生充團總率團長袁敏等擊賊追至大隗鎮賊衆大至被圍陣亡

袁敏 團長在邵溝隨團總劉清蘭擊賊追至大隗鎮同死於難

張鏡 七十一歲罵賊被戕

馮永合 罵賊格鬪而死

蘇旺 賊迫脅入夥不從被殺

于 瑄 罵賊格鬪而死

盧福元 在馬脊嶺罵賊被殺

王秀全 團長在呂坡擊賊身被重傷死

王秀元 在崔岡陣亡

程祿旺 團長率衆殺賊甚多追至關口賊勢盛力不支身被重傷死

盧德臣 團長以烏鎗斃賊數名被執罵不絕口賊殺之

王教清 在王堂溝擊賊陣亡

以上四十三名均於同治二年呈准入忠義祠

政事

漢

侯 霸 後漢書本傳霸字君房河南密縣人也族父淵以宦者有才辨任職元帝時

佐石顯等領中書號曰大常侍成帝時任霸爲太子舍人霸矜嚴有威谷家累千金不事產業篤志好學師事九江太守房元治穀梁春秋爲元都講王莽初五威司命陳崇舉霸德行遷隨宰縣界曠遠濱帶江湖而亡命者多爲盜賊霸到即案誅豪猾分捕山賊縣中清淨再遷爲執法刺姦糾案勢位者無所疑憚後爲淮平大尹政理有能名及王莽之敗霸保固自守卒全一郡更始元年遣使徵霸百姓老弱相携號哭遮使者車或當道而臥皆曰願乞侯君復留期年民至乃戒乳婦勿得舉子侯君當去必不能全使者慮霸就徵臨淮必亂不敢授璽書具以狀聞會更始敗道路不通建武四年光武徵霸與車駕會壽春拜尙書令時無故典朝廷又少舊臣霸明習故事收錄遺文條奏前世善政法度有益於時者皆施行之每春下寬大之詔奉四時之令皆霸所建也明年代伏湛爲大司徒封關內侯在位明察守正奉公不回十

三年霸薨帝深傷惜之親自臨弔下詔曰惟霸積善清潔視事九年漢家舊制丞相拜日封爲列侯朕以軍師暴露功臣未封緣忠臣之義不欲相踰未及爵命奄然而終嗚呼哀哉於是追封諡霸則鄉哀侯食邑二千六百戶子昱嗣臨淮吏人共爲立祠四時祭焉昱後徙封於陵侯永平中兼太僕昱卒子建嗣建卒子昌嗣

張德 水經注張德字伯雅爲宏農太守漢有廟碑塚尙存

明

岳岫 字宗源少嗜學通經容幹魁梧洪武二十一年舉人材累官北平右布政使
黃通理 字文中洪武辛酉年十三入邑庠旋食餼試補上舍擢刑部主事永樂中改泰州州判三年上計留辦事刑科擢戶部員外郎奉使交趾占城閱五載晉本部郎中宣德中給誥命賜寶鈔二千貫擢知江西饒州府

黃麟 進士授禮科給事中彈劾不避權要竟以抗直忤時貴謫永平郡丞大著政聲擢陝西參議分守漢中兼備嘉洛兵民感戴之後改姓楚祀兩地名宦

黃縉 進士令金壇戢奸均賦復豪右吞地數千頃值歲歉多方撫字馬從謙撰荒政序謂其出公羨以補正賦願免職以代徵逋又述其上書直指有民無所從出而上必求如常格不過逼之使逃促之就死終無益於國賦而本實先廢寧甘心伏首待罪云云其誠心爲民如此擢南戶部主事直道不阿致仕歸里請於守令毀淫祠建書院教子睦族鄉黨稱頌焉

楊聰 字德明涿鹿衛經歷治績丕著擢神木縣尹地僻民囂俗尙武健聰以文教化之民俗不變孫言性恬退嚴氣正性不妄言笑與物無競司訓平虜衛見諸生必整冠帶雖盛暑不廢

錢浩 博學無方有經濟才舉試江南儀徵主簿政績大著儀人德之

魏蟠 揚州經歷贊政忠勤苞苴不入攝高郵州事廉慎多惠政鞭朴不施士民愛之爲歌曰父母育我兮魏使君精神挺兮天上聞

楊永楨 居家孝友歷任肥鄉宛平主簿所在有治聲

清

周相 字元輔家貧勵學以進士補湖南湘陰令力請蠲免被水懸糧地銀兩民困以甦調龍山地係苗疆新闢爲編保甲課農桑興文教禁溺女又捐置育嬰堂再調瀘溪平反多案民歌頌之

李士昭 字瑞徵以舉人令瓊州感恩縣感恩海外荒陬糧戶不滿四百家舊欠積三千金民既難償官多被斥乃力懇上官停一切雜項多方勸諭竭力完納不二年夙

欠頓清逃亡復業又海南瘴毒傷人尤多前官歿於任者均爲措辦資斧護送還葬
楊樞 性孝博學能文事多豪舉順治己亥開超貢科與甲科同銓試補推官治聲
頗著

楊芳 歷官江西寧州知州興利剔弊人稱慈母

屈正宸 字子恪令雲南羅次捐俸八百金浚青山邵霸池灌民田數百頃又捐修五
馬橋百貨雲集遂成巨市民甚德之

張星爛 字明辰令山東清平時屢荒多逋賦奸吏乘間侵蝕星爛釐剔奸弊民樂輸
將疏鑿馬頰河水不爲害又請於運河多設水夫民得免累

陳杲 字升如以舉人令貴州修文縣洗冤雪滯循聲卓著晚年有志歸田左遷廣
文改補宜陽教諭奉府委登封收漕平斛兌量頌聲載道

鄧 隆 以拔貢令滿城一意振刷百廢俱興懲奸猾均徭役救災荒時虜患方殷繕伍治兵布置有法攝完令一如治滿以疾卒於官士民哀之

李 滋 爲武城令以憲直忤時解組歸

李長安 字西村以拔貢令安徽定遠輕徭薄賦勸學課農定人德之請祀名宦祠

張曾益 字魯齋以舉人令四川納谿辦理保寧軍需歷署營山涪州皆有政聲其在

涪州鄰寇入境督鄉勇旬日平之

以上見舊志

王格正 字任夫舉人幼失怙事祖母楊母周孝養備至及長篤學勵品邑人皆欽重之道光元年舉孝廉方正籤分山西知縣加六品銜歷任大寧壽陽汾陽河曲屯留等縣均有政績旋署渾源州歲稔倡捐籌賑全活無算卒於任祀名宦尋入本邑鄉賢祠民國初中州徵輯文獻列入循良著有保甲酌已付梓更有研幾錄求矩編明

慎摘要荒政紀畧要政豫籌等書藏於家

裴廷桂

子德莊孫雲鏗並附

字芳山舉人性方嚴有威重歷任山東平原即墨掖縣邱縣

長清膠州等處所在興利除弊嚴而不苛大姦土豪聞風逃避解組後值歲饑邑侯景委辦粥廠辛勤任事以待哺者衆鬻產買穀數百石助賑至冬施棉衣四百件又施義塚地五畝人以裴善人目之子德莊有父風好義急公德被鄉里孫雲鐸字聲五性孝友洞達世事善解紛難光緒丁丑歲饑襄辦賑務心力交瘁積勞成疾而卒盧驥雲 字鶚秋舉人性嚴重有幹材以大挑一等任江蘇碭山知縣值歲饑適忠親王軍糧在碭存儲意欲借此振貸或謂軍糧不敢擅動請而後可驥雲曰救荒如救焚溺稍緩如民命何禍福吾自任之忠親王聞之大加獎異旋署海門同知清理積案民無冤抑以積勞歿於任所子逢辰逢甲俱庠生孫葆謙登賢書

張汝梅 字漢仙志周子也慷慨有氣節痛父殉難年十七以雲騎尉投効袁營條上方略誓殺賊以報君親奉檄領偏師歷平亳州滑淮廬鳳諸賊以軍功保舉道員賞勵勇巴圖魯尋加按察使銜肅清後以母老乞終養僑寓清江浦辦理鹽務財雄一方會河南大饑密人以同鄉故就食者衆煮粥給食無失所者次年皆資遣回籍密人德之無何丁母憂服除授廣西右江道因剿匪出力擢晉臬陞陝藩兼護理中丞印以甘新籌餉功賞頭品頂戴旋授山東巡撫整躬率屬每遇水旱凶災輒捐貲振救清淮湖灘地舊歸承領全數施入各書院及育嬰堂等處時值賠款甚急又以鹽務歷年所積報効十萬金光緒庚子兩宮西狩時抱病家居不獲馳驅從王念時事孔棘以三萬金獻行在毀家紓難毫無吝色德宗嘉其忠悃命其子書蘭書年均以郎中歸知府選用書恆以部曹供職其爲朝廷所器重如此至其修書院置學田修

神廟諸義舉皆生平細節不可枚舉云

張紹

仲衣

均耿南子紹衣字孟侯進士由戶部主政歷官御史風節凜然不避權貴後值歲凶收育嬰孩全活甚衆無子以姪爲嗣晚年舉一子人以爲育嬰之報紹仲舉人以大挑河工知縣借補通州土壩州同歷署清豐南樂東明阜城等縣皆有頌聲去南樂時民懷其德贈以衣繖等物時人榮之子麟閣亦登賢書

張增祥

字晉卿性警敏以進士即用知縣分發廣西辦團練出力保知州尋以守城

功保同知歷任荔浦北流等縣折獄明察革除積弊紳民爲製牌繖登堂稱頌時毛匪入境募勇剿捕斬獲甚衆人呼爲張老虎洪楊之變守境扞禦不遺餘力積勞病歿事聞贈知府銜賜祭葬銀二百四十兩子保定廬州判

王化堂

字蒞之幼沈敏清苦自勵讀書講求實用由進士入詞林尋改兵部主事供

職數年擢監察御史同治丁卯簡放東河兵備道抵任後察閱隄壩疏濬培補運道暢行又開十字河以避湖險公私船隻均蒙其利光緒丁丑密大饑爲捐千金以惠桑梓又以村西水道衝激行旅維艱大興版築以工代賑活人無算後陞兩浙鹽運使整理鹺務革除積弊國用以饒未幾丁內艱回籍以哀毀成疾而卒子瑞麟孫祖源祖潤祖瀨均登仕版能繼家聲

翟允之 字誠齋爲人謙和有度好獎勵人材由進士歷任湖北鄖縣湖南黔陽臨武攸縣知縣道州知州所在鋤暴安良振興文教政績宣著尋蒙大計卓異陞郴州直隸州以年老告歸專意成就後學嘗主講檜陽書院學者仰之如泰斗云

孝悌

元

胡伴侶 父患心疾幾死伴侶焚香籲天以佩刀割左脇肉煎藥以進父病若失事聞
詔旌其門

明

程 鰲 幼喪父事母最孝母病割股肉和藥以進母歿負土成墳廬其側三年哀哭
不絕塚上產靈芝三株嘉禾一本三穗事聞詔旌其門

馮時通 家貧業木工菽水承歡以孝聞母疾割股進之愈上官旌其門

陳邦寵 親歿廬墓側每日抱土封塚哭拜足迹不至家者三年祥雲結聚墓上雉兔
馴擾直指使者稱爲純孝萬曆中旌表

陳 經 事久不可考大隗鎮有坊顏曰孝行

閻中傑 父病割股和藥尋愈兩院旌其門

程雲路 父病醫不能療雲路焚香祝天願以身代刲股和藥進之愈縣旌之

李明孝 母魏氏病劇祝天割股和藥以進病遂愈兩臺旌其門

李成教 母病久不愈成教夜夢神曰刲股可愈既寤如神言病果痊兩臺旌之

楊晉 邑增生事母孝舌耕於外有讒其妻不孝者遽出之後事白乃復合

韓繼周

附

明季城破守護父旁父揮之使去二子號泣不忍離賊至父驚死二子皆遇

害

魏儀 蟠之子母歿臥柩側七年柩畔生芝父歿負土爲塚廬墓三年有烏鵲集其

巔赤蛇蟠其下其孝感如此

楊孝 字希舜生八月而孤母朱割耳矢志孝少奉母教或語及母苦節事輒嗚咽

流涕母卒哀毀幾滅性及葬負土築塚廬墓三年後爲鄒縣丞以清慎著子維清一

遵父道子孫五世七歲貢

清

劉清 父病割股兩臺旌之

端木世奇 性至孝二親繼逝負土成塚日夜號泣廬居三年縣旌之

蔡光遠 邑諸生字子厚國翰長子性至孝及失恃痛不欲生忌日尤致哀慕然恐傷父心每背地飲泣

慕韶 字心虞邑廩生以孝聞事母朱出告反面飲食必親母病韶侍湯藥晝夜不離倣古人嘗糞甜苦以下瘞劇元旦爲文告神祈促已齡延母壽後母享壽九十有九及歿哀毀逾常服闋而卒

周郇 字伯雨增生父患癱支離牀褥郇侍湯藥晝夜不解帶後稍愈出入扶持歷

十二載無惰容父卒事孀母頃刻不離家貧母命舌耕他鄉每飲食輒泣下遂辭歸
母子聚首菽水承歡朝夕之間融融如也

郭文怡 年十三母病奉侍湯藥晝夜不懈母歿撫三歲弱弟哭泣柩前飲食不入口
里人爲之感傷事父承顏順志惟恐或違父歿哀毀骨立子元陞舉人

陳 健 性孝友少孤家貧竭力躬耕以供甘旨惟恐失母歡母病湯藥親嘗目不交
睫呼天願以身代母病果愈

楊名揚 父客閩不能歸名揚年十五乃學算卜以資路費歷關津數千里往省之三
年中往返者再後聞父歿徧籲親族得資斧晝夜奔馳負骸骨奉母攜妹以歸子爲
鰥拔貢

李興隆 家貧針工度日以養其父父歿南方裹糧徒步涉險數千里負骸以歸撫憲

旌其門

周 梓 性至孝母黃病喘甚劇梓聞禹州有良醫往邀之值潁水暴漲人不敢渡梓向河號泣水驟落丈餘人驚異之兄相宰江陰梓赴任省兄夜夢神語之曰汝父病將歿於某日梓星夜馳歸父病已不能言向枕邊呼父父忽睜目曰兒歸吾無憾矣至期果卒

項臨禹 二歲時父歿於亳州惟母是依稍長赴亳尋訪果於古廟得之負骸歸葬知府柴給孝子銀牌獎之

張九如 本馬姓爲張氏養子義母張孟氏所生子蕩於外九如傭力供養無缺

張漢傑 字三同事親至孝樂善好施

李日曉 字東陽邑庠生性孝友慷慨好施弱齡遭親喪葬之日縱身投墓中幾以身

殉姊貧分田三十餘畝以養之教其子使成立族人孤貧無業者輒分田給之

王楷 字端木少貧性孝友撫兩姪及姪女若己出及卒姪亦哀痛持服人稱孝義

萃於一門

陳光遇 字季侯廩生篤孝友親老傭讀以養年五十依依親側若孺子焉上有三兄
事若嚴父謹言慎行跬步必端學者仰之

韓昌 杲字若木昌字世五俱繼文子杲童時密城陷母錢氏罵賊殉難事平求母

尸不得嚙指流血始得認母骨哀號泣血死而復甦者再後以恩貢乘鐸南陽上蔡
皆勤其職昌少孤事孀母孝每逢親忌齋戒涕泣哀慕終身工行楷書

寇國順 字承天太學生生三月而孤痛母苦節恆以不獲顯親爲憾後母旌表入祠
乃流涕曰吾母傳吾心慰矣每春秋祭日距城五十餘里必先期齋戒具衣冠赴祠

三十餘年不懈乾隆朝節孝祠祀首倡謀新

王作梅 字百和太學生性孝友析產不計肥瘠喜助人婚葬鄉里有爭端經剖決即帖然服人是以重之

張廉貞 字介石增生性孝友家人化之皆和而敬又輕財好施善解紛難

劉德行 字子懿庠生明劉先十三世孫也家世忠厚醇謹好禮數世同居人無間言有張公藝之風

陳登 性孝友足跡不入城市生平無怒色戚容與人無爭競亦不道人是非壽九十有二

周永寧 庠生字敬五事父母恪供子職處事接物意氣慷慨有古人風

周鴻道 廩生有至性成童失怙有季父二年相若事之如父事兄亦然兄歿遺孤二

撫若己子處世忠厚未嘗有競心子訪禮舉人

樊惠渠 庠生居家孝友處世忠厚安貧樂道嘗書銘於座右曰人世豈無義外利我生自有命在天可想見其爲人矣

周積功 字緒遠增生性孝友著家訓三十條皆以身作則率子弟躬耕即於隴畝說詩書中年喪耦或勸繼娶曰吾年逾四十娶處女誤人一生吾不忍娶孀婦使人失節吾不爲也又著五自得序培子弟說

冉溶 字文祿舉人性孝友持家勤儉有法鄰里困乏者周之不遺餘力尤能禮賢下士

韓仁 母病身侍湯藥晝夜不倦病篤乃夜奔三官廟焚香祝禱割股煎湯進之遂愈

傅松 事親色養兼至少喪母朝夕設奠於墓哭泣盡哀者期年恐傷父心不令知也

徐大相 八歲喪母及長念父鏃居同弟大業屢勸繼娶父不許相委曲承順得父歡心人稱孝焉

韓廷選 父病割股和羹以進遂愈

王廷英 孝事孀母母久病不思飲食英恐不起禱於神刲右膂肉爲餵餵母食之而愈舉家不知也夏月脫衣見其痕固問乃知之

張作極

孫基永附

庠生事親愉色婉容家庭之間融融如也父患瘍浴瘡敷藥必躬親

之衣不解帶九十餘日無倦色事二兄恭敬純篤終身如一日孫基永貢生母患鶴膝風輾轉牀褥七年基永屏絕人事奉侍湯藥衣垢不滌人罕見其面研究醫術自

製方藥母病竟愈持身嚴正教人多勉以敦品力行曾孫惠洽元孫紱方均舉人另
有志

司萬忠 母寇氏年八旬臥病三載晝夜不離側湯藥必親嘗一日母思魚時天旱水
減購之不獲乃跪水濱祝之聲淚俱下忽羣魚躍出一舉九尾人以爲純孝之感

郭元長 字乾一性孝友繼母患癱疾元長晝夜不離左右枕席不就者二載居繼母
喪不入內室不御酒肉女兒貧迎養至老並營殮葬精岐黃人稱國手

樊士楷 八歲隨父克惠避荒至陝父病乏食丐以養之父故典身買地以厝寓陝十
餘年卒負父骸旋里時嘉慶五年教匪謀亂潼關道梗紆行徒步冒險千餘里卒無
恙

趙 瑗 習陰陽術父病篤嘗糞喜曰糞味苦無虞也果愈

秦 楹 字樹丹庠生事母至孝母病癱衣不解帶者四年母歿哀毀而卒

尚 超 字越衆武庠生事繼母孝妻亦善承夫志割股療姑病兄弟五人六世同居
樂善好施解紛排難閭村百餘家向不涉訟超之力也

王 振 性至孝母病割股以進母卒悲哀過甚久而成瘋自縊死

周同仁 字衡章廩生少失怙家貧得甘旨必進居母喪不入內不與酒宴每祀先必
涕泣鄉里稱其孝因母病習岐黃無貧富輒往不受謝著傷寒論辨症詳說

雷天佑 母病思食肉家貧不能得割股以進三日病若失

劉 檀 字馥堂庠生偶適太康聞父病號泣旋里晝夜不息比入門父已卒痛不欲
生每教讀至父母在不遠遊章輒泣然流涕析居時田產盡讓諸弟鄉里有兄弟相
爭者人輒諷之曰盍效劉馥堂

周 翹 字鵬萬母寇氏甚畏暴雨及歿葬南郊三里許每遇暴雨必奔墓號哭雨止乃歸凡有大事出入必至墓前稟告孫寬讀孝經每爲講說輒泣然泣下

裴大脊

子紹夔附

字承思母病疫家人恐傳染不敢久侍天脊獨侍湯藥不忍暫離母

病遂愈子紹夔字宣著父未葬遭火災以水沃棺且沃且號迨衆衝火昇棺出而背已焦爛紹夔不自知也

王 義 字心裁父寢疾晝夜不離不解衣而眠者十年母老惜憤事亦如之處兄嫂無間言怡怡如也

陳景揚 割左股療母病遂愈

韓之弼 增生字富公繼文孫性孝友善居室置私田數頃析箸時曰同居無私財遂公分之兄弟固讓皆不受兄老病且貧迎養之對案而食歷十年如一日

王作梓 廩生字公弼性孝友析箸後復分給幼弟產常調恤兩兄無德色解紛息爭里中賴之

張玉成 字佩璋庠生性端慤析居後復以己產四十餘畝資弟俾得專心誦讀兄弟友愛終身無間

郭應元 字台三庠生以孝友稱兄病應元年逾六十躬親藥餌無倦容修理學宮身董其事嘗捐貲重建浮山雙橋行人便之

王信志 兄弟析居兄產中落衣食無資信志迎養之糗殮必共兄未至不敢食所居曲梁東西兩河冬月涉水維艱信志捐貲修橋五十年不倦子懷能繼其志

楊 洗 家貧分爨後能勤力家漸豐兄老病無子洗悉心調護及卒經紀其喪以子承嗣迎嫂同居供養無缺子輩不忍析居率其教也

陳國夏 少貧苦爲人傭工積財置田頃餘憐胞兄國春無產以其半給之又假立賣約以杜異日爭端有丐者鬻子受價後涕泣不忍別國夏代爲購還復完聚

陳 筌 天性孝友弟出繼業薄以己產之半與之事載彰善錄

張君林 兄弟五人各異居惟君林與少弟同爨後兄貧乏喪偶復與同居並爲繼娶兄故撫其子女代營婚嫁新增地畝皆均之

鄭 增 幼失怙與弟埒力出度日年近古稀式好無尤家人子姪皆化爲雍睦焉

王世昌 家貧析居後殯葬兄嫂教養兩姪有從姪幼失怙恃撫養成立爲娶妻生子李有智 兄弟析居所分薄田不及十畝努力耕種增置七畝後兄弟不能餬口舉增置之田瓜分之嘉慶十八年大饑與兄合爨閭家賴以全活

鄭士賢 兄弟二人質性樸厚奉父命析居有地七頃兄讓弟多分弟不肯彼此相讓

遂餘田一頃以充公用

王伯泰 性樸厚兄弟析居自取其薄後兄業中落謹以分產不公泰舉所分地十餘畝悉與之無怨言

杜 寧 性友愛與弟分居弟夫婦既歿豕盡落寧撫孤姪成立爲之授室田產器物與子均分

傅林

青

兄弟二人恩誼甚篤林春曰兄弟以非禮來者吾積誠以待之一次不改至

三五次未有不感動者林青曰兄弟分形連氣未有不同心者妯娌異姓相聚未有同心者以不同心之言入同心者之耳骨肉漸乖離矣爲兄弟者不爲婦言所間未有不親愛者當時以爲至言後林春卒林青教子姪有法終身不與姪析居子咸如領鄉薦人以爲積德所致云

宋殿選 太學生事繼母以孝聞與異母弟同居友愛甚至

張文謹 與兄分爨兄業蕩盡文謹收養之兄不悛文謹竭力供給雖破家不恤也

韓世祿 性友愛有田六十畝以大半歸其弟曰弟五子我一子如此分吾猶厚也悉取宿債自任而賣其地以償之

張 璐 庠生父病癱數年侍牀褥晝夜不倦其周急憐貧義舉尤多

張作樞 庠生事親色養兼盡親歿友愛兩弟延師訓孤姪歲歉出粟數十石貸鄉鄰不責償

王國治 字平字方正好義有從姪二其一隨母改適甚失所國治招與同居爲娶妻室復以產均分之

馬基業 字肇域歲貢父有養子愛如同胞田產悉與共之又慷慨好施比鄰資養者

甚多著有肥陽詩集

危卜鰲 性忍讓與堂兄弟析居讓地兩頃恐子孫有異言呈縣印約爲據

高 瑛 性孝謹繼母前夫陳氏子矢所瑛體母心招與同居立約與地五十畝胞姊

適父氏家貧亦招之來立約與地二十畝子法堯與陳文二姓同居四十五年產愈

厚乃繼父志另與陳地三頃餘文地三十畝

牛育成 有姊適喬姓家貧甚育成體母意與田四十餘畝

馬應詔 兄弟析居兩弟業中落應詔以田一頃二十八畝令均分之

張瑞興 躬稼穡意氣過人撫從姪芳聲成立爲授室焉有田六十畝令與二子三股

均分

馬中選 十二歲失恃有適母所生姊寡而貧中選十七歲遵父遺命給田六十餘畝

以上舊志

王經元 太學生持躬教家均有禮法事親孝內外無間言姪諫早卒臨終以孤託焉
經元盡心撫養飲食教誨無微不至遺孤即格正也又以城北乏水捐貲掘井供一
方之用年六十衣冠端坐而逝

王 實 生有至性篤學勵行事親能得歡心疾革鄉人共禱於神以祈延命歿或以
詩哭之其爲人所重如此

王 錡 太學生痛父早逝事祖父母暨母竭誠致敬均無間言

王格愆 增生性嚴重八歲失恃能哭泣盡禮叔母馮愛重之取爲嗣及長敦品勵學
七世同居書香綿延不絕

孫克昌 克昌字裕之歲貢品端學富教誨多術捻匪擾密其父老病在牀事急與弟

黎昌昇入寨途中遇賊攔截索財捉黎昌加刃於頸克昌伏地哀乞曰吾弟也若殺之吾父亦死矣乞留吾弟以全父命詞意哀懇賊義而釋之

王鳴山 素業儒有至性父疾劇嘗糞知病不起籲天哀祈願以身代泊卒每飯供奉
歿齒無間

王義蘭 性純篤髫齡失恃事繼母孝異母弟三人友于甚篤

王格凝 太學生事親孝粵匪至密一城盡逃母郭百有三歲不能去與妻張冒白刃守之不忍離賊酋憐其孝旗於門戒勿犯滎陽孫師竹太史爲作孝子傳民國探入
中州文獻

王翰屏 字憲菴庠生性嚴正讀書務求心得身體力行事親孝承歡無違遇父母盛怒必柔聲怡色格親心而後已

張念銘 字承渠增生幼失怙事孀母孝母患狂疾防護周至湯藥親嘗身雖出繼孝不爲減生養死葬一身獨任之善書法見稱於時

翟鵬霄 字近郊庠生耿介自持言笑不苟事親務期養志每自外歸必遺以甘旨膝下承歡數十年如一日親歿喪葬盡禮哀毀骨立鄉黨稱之

侯玉魁 字應機繼母患腹疾侍奉湯藥衣不解帶數月及逝哀如生母弟玉照好漁獵戒之曰殺微物亦損陰德弟納其言而止析居後弟不給伙助之

周廷選 有至性少失怙事孀母垂三十年晨昏定省無缺姊適孫氏貧不能自存置田四十畝贍養之光緒丁丑歲大疫出所有賑濟鄉人全活無算其學以敬爲主學者稱爲主敬先生

張復鐸 字振之庠生以孝謹聞母患股疾不能起晝夜侍奉不離左右父增祿司鐸

安陽歿於任時有風鶴警聞計冒險奔喪扶櫬回籍叔父增祥停柩未葬寇至家人皆逃復鐸獨守不去哀乞鄰里遷柩夜葬得保無虞子恩湛庠生書香至今未墜

周如芝 字馥堂太學生性孝友治家謹嚴父八表餘如芝亦年逾花甲承歡膝下愉愉如也弟如蘭經商折閱七千緡如芝鬻產二百畝代償之毫無吝色後辦本保公事公正和平甚孚衆望又善小兒科全活者不計其數旣賀昌庠生孫金相優廩生

劉逢理 字振歧太學生性仁孝每遇先人誕忌日赴塋奠祭必敬必誠創建家祠續修族譜悉心提倡不辭勞瘁姊家綦貧迎養之周急憐貧於鄰族尤加厚焉

高雲瑞 家貧而性至孝痛父早逝事孀母甘旨未嘗缺依母而宿者二十載每外出雖風雨必歸母寢疾湯藥親嘗數十日未曾解帶及歿廬墓三年

胡榮祿 幼赤貧爲人傭諸兄相繼歿隻身養親無缺乏母失明步履需人左右承奉十餘年如一日晚年家漸裕嘗訓子孫曰吾本貧人深知貧人之難與人共事必以吃虧爲上不如此非我子孫年逾古稀而卒

王伯興 太學生少失怙事親以孝聞年近七旬母猶在堂色養兼盡有老萊風素精痘疹術全活甚衆

徐中相 字潛山以勞績獎八品銜事親出告反面定省無缺父歿每夜俟母安寢始歸私室與弟中魁同心共濟百口同爨庭無間言又嘗創修家祠以聯族誼光緒戊寅歲大饑以工代賑多所全活邑侯王以十世同居匾其門

郭懷瑾 幼讀書父卒躬耕奉母母病篤割臂肉和鷄羹以進母病尋愈

樊朝琰 字懶亭啞而好學性孝謹父素有樗蒲之癖每夜出朝琰候門雖夜深不去

父還始歸寢父感愧卒改前行人以是稱其孝尤工丹青片紙遺蹟人皆什襲藏之
子在田孫華南均庠生

李 輝 有孝行父患癱症親侍湯藥衣不解帶者百二十日及病篤嘗糞味甘謂家
人曰此危症也痛幾絕

白雲路 性仁孝事親務盡其誠捻匪犯密父病癱負以逃難猝與賊遇以身障父賊
憐其孝笑曰吾不汝傷但索襪履耳解而贈之賊遂去

郭懷珍 字聘卿庠生忠厚孝謹母病癱侍奉八年始終不懈穢褻之役皆身親之

趙振鼎 武庠生父病癱母患背疽常在牀褥親侍湯藥三年不懈兄開採煤鑛賠累
甚鉅振鼎以四百金代償後以寡嫂貧苦合囊供養以終其身

張體泰 字青岳歲貢兄弟析居弟業落外出遺兩姪俱幼體泰收養之爲之成室後

弟歸與合爨財物器皿皆共之

吳祿 家饑貧治工度日辛苦備嘗值歲荒三兄攜室外出祿隻身養母寸旨無缺母卒每飯祭而後食終身不忘

龍鳳翽 字瑞卿少年老成善體親心父歿勸弟力學爲顯揚計弟登賢書喜曰可以對吾父矣姊妹適人家俱貧爲置田資之終其身

胡留成 居臨洧水適大雨水暴漲夫婦抱二子扶母登磨頂俄牆屋傾圮水愈急懼不能兩全磨旁有樹一株棄子擁母而登得不死人以至孝稱之

崔承宣 字化堂母病癱八年須臾不離左右飲食梳洗必躬親之後祖母寢疾事之如事母鄉黨稱孝無間言

錢祝三 字慶多家貧舌耕養親父病癱侍湯藥衣不解帶數年如一日事異母兄委

曲調護有王覽之風

馮嘉樂 例貢事父母和顏愉色中年過房事所後母亦極孝融融洩洩人無間言

張清文 績學未售性至孝捻匪之亂父罵賊遇害清文痛父死非命奉木主於書室
每飯必祭母年高事之尤謹依依膝下惟恐失母歡

張景堯 字心陶庠生早失怙母嬰疾奉侍湯藥不離左右家雖寒素生養死葬不忍
從薄性方鯁設教里塾人欽重之

傅炳耀 字星若歲貢性孝謹事父母色養無違親歿遇忌日先期齋戒率子姪奠祭
銜哀致誠教人嚴而善誘與人交勸善規過無假飾精醫術多全活者

王九官 字虞臣太學生十四失怙力田供母事無大小悉依母命母疾親侍湯藥及
歿哀毀備至中年家益裕侵畔者不較借貸者不吝凡事退讓以承母志壽八十有

八而卒

張文箴 字敬齋幼失怙母有足疾艱於行髮逆擾密家人盡逃文箴獨侍母不去叔歿迎孀母及弟供養之後仲兄漢仙援入軍營因功保舉道銜陰子書銘州判孫天德縣丞

王統基 恩貢候選教諭性孝友兄弟五人家中落舌耕餬口析箸後兄弟相繼歿所遺子女養撫婚嫁一身獨任之雖窘迫不計也講學授徒孜孜不倦初無子以姪爲嗣垂老妾忽生子人以爲孝友之報云

陳心德 少孤貧母趙雙目失明左右扶持維謹每自外歸道食物奉母菽水承歡人無間言

王順之 庠生生時父歿僅三月幼而恂謹長承母訓入泮後教讀奉母與堂兄元之

友愛甚篤無異同胞壽八十有四

朱昭彥 字俊卿縣丞職父母俱病癱親侍牀褥飲食醫藥悉心承奉與兄析居田產器物讓而後取語人曰兄食指繁固應爾也

劉金聲 太學生二歲失怙事繼母孝母卒與弟析居衣食棺槨皆獨任之

朱敷明 字子煥明宗室勤炤裔也幼失怙恃典鬻營葬鞠三弱弟成立家庭和睦卒立門戶壽登九旬數與鄉飲

王逢甲 字應三廩生性孝友母病百里求藥中途山水暴至幾漂沒卒無恙母歿侍父寢食晝夜不離父歿哀毀成疾而卒弟甲榮從受學不忍督責惟本身作則曲爲引導卒以成名

郭景美 字誠齋性純孝幼失怙母病癱奉事未嘗暫離居母喪哀毀盡禮制內不入

私室鄰里稱孝晚年設塾鄉里教人以孝爲先又與兀公煥勳遊人皆以理學名民國八年公請褒揚

李克明 字愚室號月亭增貢性耿介事親孝母傷股侍醫藥起居不離歿後聞人呼母輒哀慟不自禁其至性若此長子麟賀庠生

寇南斗 至性純篤母患目疾赴藏求礪二年餘始還父歿廬墓百日母歿廬墓三年趙套 農夫也性至孝事親無虛飾母病刲股療之尋愈

危士修 事親恪供子職兄弟四人怡怡終身鄉里稱頌之

王敬生 字慎齋有血性擒匪犯密年十六從母逃難母爲匪刲持兵向賊曰母歿子死今日吾死日也髮上指賊相顧曰孝子也釋其母而去

王丙堃 庠生母病四肢不仁飲食醫藥必躬親之爲母梳髮浴足者十餘年父病癱

亦如之

郭逢南 車繼母孝異母弟四人友愛備至終身無間

張秉智 字子明母患足疾侍湯藥未嘗廢離如是者數年七世同居鄉人傳爲美談

寇寅斗 太學生母患目疾湯藥親嘗後棄儒就醫稱國手母歿廬墓百日

郭長慶 母病服藥罔效割股啖母病立痊

朱昭章 字文齋庠生父母俱病癱飲食起居委曲承奉歷有年所又善解紛難人皆

愛而敬之

于培芝 太學生兄弟析居田產什物任弟自擇有薛孟嘗之風

朱生 母患癱十餘年晝夜侍奉家人感其孝亦如之

郭嵩高 少孤事孀母孝始終無違鄉里稱之

牛金鐘 家貧性孝父母有疾廁牖必親嘗負販爲養親之資志行高潔不染流俗親歿服闋棄人間事遊華嶽莫知所終

張鑑五 庠生父病癰侍湯藥夜不解帶穢褻之役皆親之

于永瑞 太生學母年八十餘飲食需人永瑞親執匕箸者數年子海亭海同均入庠周興國 家小康有族兄貧無養與田十畝佃而薄其租兄病篤語之曰我死妻寡子弱溝中瘠耳興國慨然曰免吾租自食之俟姪成立還吾田可乎兄頷之瞑目而逝

後卒踐其言

劉培樟 性慈善舉家染時疫兄嫂尤危培樟竭力承奉卒無虞尤好施與貧乏者多受其賜

崔永福 少孤祖母病百藥罔效割股禱神尋愈

趙爽 恩賜副貢兄弟友愛母病癱率妻孥承奉歷久不倦值寇警衆皆逃兄弟昇
母入山卒免於難

劉宴 家貧失怙無妻室事寡母孝母近百歲動作需人宴委曲周旋猥瑣之役必
躬親之

劉鳳山 兄弟析居獨養母二十年母歿殯葬皆出己資兄弟貧乏又時周恤之
韓書芸 太學生少孤善事孀母先意承志每外出暮必歸遠離不忍也尤精岐黃一
方推爲國手

司昌 事繼父孝父病割股療之

陳光瑩 兄弟分爨財物多寡悉不較有無常相通珍羞必共之忠誠寬厚人無間言
劉省三 字紹曾劉先十七世孫也少孤事繼母孝土匪擾境奉母命爲寨主晝夜防

禦卒保無恙壽九十有七而終

周惠行 增生少失怙母子相依爲命值土匪亂冒險救母幾罹鋒刃賊感其誠釋之
余廣山 父病癱二十餘年飲食必親供有教則跪受其修廟補路諸善事尤多

劉允濟 中年喪母哀毀幾殞身父病腫親赴寶豐購藥奔波三百餘里子鵬舉歲貢
陳重陸 幼嗜學耄而不厭品行高潔執親之喪廬墓百日

于作舟 家貧有志操晝負販夜課讀卒得遊庠父老病左右不離凡有所欲委曲將
順始終如一以孝聞於時

錢桐豫 字子茂布政司理問性仁孝父嗜魚母嗜羊肉親歿觸物傷心終身不忍食
嘗捐金建松泉書院及義塾膏火人艷稱之

趙 八

孫五附

幼孤貧事母極孝每食必請所欲日以爲常孫五性至孝事母備甘

旨親主中饋母患痰疾吐輒以手承之人以爲有祖父風又輕財好義稱貸者無不與冬月遇貧人號寒即解衣贈之

劉廣出 庠生親疾侍湯藥衣不解帶者累月親歿每逢節忌祭必躬親讀書明大義不爲章句之學訓誠子孫胥本諸此子德竣德懋俱庠生

李同升 增生父病癱母患鶴膝風同升周旋其間飲食醫藥躬親侍奉歷久無惰容閭里咸稱其孝

李同樂 太學生事親善養志親歿二弟甫數歲撫養成立後二弟相繼逝撫遺孤逾所生析居時財產讓姪輩不與較晚嗜醫活人不可勝數

劉鴻勳 庠生母寢疾親侍湯藥年餘不懈母歿哀毀骨立設教鄉里多所成就

王文炳 性孝友善事繼母兄嫂殯葬皆出己貲所遺子女收養之爲謀婚嫁田產悉

與諸姪共之

王保成 家貧有孝行母病危割臂啖之愈臂創兩月始平

韓景頤 善事父父歿泣血喪明撫孤姪無異己出人以為孝慈兼至云

義行

明

王順全

正統五年輸粟各千石詔旌其門

韓忠恕

成化十八年輸代粟四十兩予冠帶不受

魏尚謙泰

尚謙前後輸粟一千四百石又建廣濟石橋施義塚尚泰輸粟二百石俱荷

旌表

張守安

明末旱蝗富豪吞噬貧弱守安獨減價平糶以大升斗出之有負欠者折券

棄債概置不問守安問明父也見武功門

郭躍蛟 禮部儒士崇禎末累年荒旱而催科不輟邑令朱敏汗縉流民圖欲徑達天聽徧求民間無敢任者躍蛟挺身願行卒獲上聞密糧豁免邑人德之晚年家益落獲殮不給有鄭州人遺銀數十兩於路拾而還之一時傳爲美談云

趙國泰 樂善好施恩洽族黨屢蒙上憲旌揚

周維魯 邑諸生性忼爽里黨有紛爭者輒出平之不令涉訟嘗拾任姓遺金袖還之

許文明舉 考職以主簿用候選京師弟文舉爲司獄適有邑人解官銀二百兩被劫邑

人持批涕泣自分必死文明憐之與弟罄囊資之不復索抵孫春榜見知高文襄以女姪妻之年七十侍父食必親嘗弟蕩費官款爲鬻產償之父聞之不平春榜怡然曰大人勿嗔田園易置兄弟難得也其行誼爲縉紳所推重

錢

梅標

標字健吾幼讀詩書隱刑曹間凡治獄輕重出入必佐以慈祥明季流寇充斥施地百餘畝糾衆築寨爲避難計衆推爲寨主以讓張問明而已左右之竭力捍禦卒保無虞接引名流輪蹄充牣有孟嘗之譽弟梅輕財好義晚年無子散萬金之產以資貧乏至今無有道其名者但稱錢少府云

錢安民 好施與掩骨埋齒於洧水南岸施水陸地十畝建龍神祠於中央四面開鑿龍池土人資以灌溉又於洧之西嶺施義塚八畝北嶺施義塚十二畝嘗夜過其地聞鬼語曰主人醉盍往送之以燐火導至家如是者再

鄭思賢 字又齋家巨富矧急恤難修橋補路不可枚舉明季闖寇之亂魏持衡勸之入城辭曰吾去吾一方無噍類矣乃不惜萬金築寨於岳村西南溝保護千有餘家今之魏寨即其地也

鄭 卨 字發祥庠生明季獨出貲財築寨於岳村北梁溝里人賴以安全

清

李遐齡 字堯眉舉人敦內行篤友誼制藝甚工學者爭遊其門在京師同年李病竭
力營救得無恙有同年趙謁選病故傾囊資助輿櫬送歸

蔡希元 性和厚無崖岸足迹不履城市與人交言語煦煦惟恐拂其意人有稱貸慨
與之無吝色貧不能葬者輒施棺木有陶人受價二十千實無片瓦家人欲索其逋
曰窮工耳蕩業而畢吾債吾不忍也

李維剛 太學生品行端方精岐黃術多活人未嘗索謝病者路遠就醫留之食乃聽
去子曰巖孫永昶俱登賢書

馮 源 字百泉性仁孝樂善好施人艷稱之

閻澤長 字孔泗周民曾孫舉人里有盜其棗者僕獲之其人懼罪出十金爲償澤長曰以盜棗而利其十金吾爲大盜矣慰遣之其行事多類此

翟住 字汝存端方正直慷慨好施

錢喜夏 好談陰德自爲功過譜日記所行鄉人化之生十子或耕或讀各因其材均能成立壽九十上憲旌其門

王士良 家貧無餘貲出拾遺金四錠歸告其父逾月無覓者後聞縣署比追解役遂出首役得免罪縣令義而旌之

韓時行 字應天以副貢司鐸原武能舉其職嘗值河朔旱蝗奉委監粥廠勤慎不怠又以民車應差苦累爲白當事定輪轉法原人德之孫維屏舉人

楊克惠 增生貧而好學立品嚴正居城市片紙不入衙子儒珍舉於鄉

周日昌 字發祥候選同知明季土寇猖獗築寨洧南保障一方盜莫敢犯時蘇姓避
難寨中售產於昌平定後乃召蘇氏火其券曰吾前不受券恐爾等不安豈有乘危
難利爾出產哉歸其田不取值

慕來泰 字大來增生行誼端潔尤精醫術而不計酬謝遠方就醫者輒爲具食人多
感之

張作楫 問明孫字方舟庠生端方簡重居常不出門喜讀朱子綱目每對客談論至
古今得失成敗輒拊膺慷慨不能自禁族人有鬻其子者爲解囊贖之養於家能食
力乃令還

劉名卿 庠生劉先十四世孫有族弟貧甚其母死爲置棺與地給葬費佃戶欠租稞
無力償還者燬其券其義舉多類此

紀德 庠生從父星辰無嗣田產典賣殆盡餘田六畝德迎養於家雇人代種積數年所獲爲贖地營室立嗣完婚焉

陳新易 邑諸生存心任恤族姪孤苦無依爲娶妻生一女後就食宜陽久染沈疾妻女爲人傭新易具賞迎之歸復使完聚又嘗捐置義塚於岐固寺左

郭永盛 鞏明孫其鄉人欠西商銀數十兩追討甚急永盛遇於省垣代償之

任中麟 字百祥家傳醫痘如神有求必應概不受謝貧者更施藥與之

楚選 父有螟蛉子視若同胞白首同居雍正九年歲歉出穀麥周鄰里次年有償還者拒不受

馮裕昆 幼讀書長精醫術好施藥餌和睦鄉里修治道塗

李學易 父早逝與伯父同居伯父有子六人析居時學易念弟產薄作七股均分平

生好施與鄉里待舉火者頗衆有借貸難償者晚年悉焚其券

陳榮 乾隆四年外郡被水密多流丐榮見無衣者衣之死於道者瘞埋之鄉里之間濟急事尤多

陳日增 字萬福樂善好施凡貧不能葬無力完婚者輒扶助之

盧琇 好義輕財常以修橋補路爲務邑東石板坡東西要道也危石巉巖行人苦之琇倡捐修治邑令旌其門

冉良臣 太學生性好義嘗施地於其鄰年荒減價糶糧大其升斗有鄭州同宗冉永曾者在密染病幾殆良臣扶歸調養大愈乃送歸里鄭民楊輅夫婦逃荒至密窘甚願投身爲僕良臣不受周恤之其子鬻於鞏爲贖回收養之麥熟遣歸夫婦感激欲

絕

張星煜 字光辰 庠生 事親孝 年耆艾 依依膝下 有老萊之風 其賑貧恤孤 諸義舉人
多稱之

王法 從兄家貧 欠陳氏債 不能償 將呈控 法鬻產代償之 又從姪積誠 庠生 家貧
墾地數畝 資膏火焉

馮廷弼 家世忠厚 力田好施 貧不能婚娶者 輒飲助之 事上聞撫憲 以善人 銀牌獎
之

來百工 弟百和 蕩其產 且喪偶 百工招與同居 爲續娶焉 所有田產 仍均分之
張如修 字永叔 樂善好施 和氣近人 精眼科 求醫者如市 稱爲豁矇聖手 後享遐齡
人以爲行善之報

竇宗程 家世忠厚 每歲蓄藥濟人 一介不取 又嘗施茶道 左以惠行旅 歲以爲常

張時行 吏員善承父志子惠困窮捐施棺木里人頌之

李堯 性謹厚多隱德乾隆七年修卓坡及小頂路又於龍門口施茶數年行人德

之

孫建業 少好醫常以濟世活人爲心鄉里有病恆施藥餌病愈不受謝邑令旌其門

呂逢泰 太學生乾隆二十二年河決逃民絡繹糧價踴貴逢泰捐貲拯救多全活者

翟逢午 字明辰事父母以誠敬教子孫以禮義拯災濟難取懷而與無吝色

王進彥 慷慨好義於城西草廟倡建茶亭置施茶地行人便之

樊洧 庠生性寬厚有受業者不問脩脯訓迪不倦又精於醫活人不受謝乾隆丙

午瘟疫流行洧年八十餘爲人療病朝夕不遑嘗拾道左遺錢五千立俟其人還之

樊卜鰲 子德元附 字瑞生仁而好施折券棄債鄰人被訟累執契求售卜鰲曰乘人危

難而利其產不忍也反其契贈錢數十緡子德元廩生端品勵學乾隆間東郡被水
逃民至密煮粥給食全活者衆

孫顯宗 七世同居家口百餘男耕女鋤而無私財用長木鑿穴爲兒童食器一童不
至衆童不食一時目爲義門

周維翰 增生好施與貧人至門寒衣之飢食之告糴不問價足否立與之子郅亦有
父風及卒弔者多不相識拜奠哭泣不言名而去

朱三元 庠生善岐黃活人甚衆不受謝有姊適寇氏家貧甚三元招其全家收養之
十餘年

陳秀儒 喜施濟尤敦族誼有同族四人皆赤貧悉與以居處爲之成室嘗曰鄰里困
乏尙宜周恤况同族乎

梁 倬 性和而介言無虛諾取與分明中年家漸裕乃慷慨好施乾隆間杞縣饑就
密食者無數倬捐粟施飯多所全活

王彥方 太學生族叔聘年老家貧彥方收養其家又爲其二子成室有族兄仁者貧
與族叔同爲營莊基一處草屋數間常周恤之

王雲露 好善樂施人有鬻端必委曲和解施捨丸散四十餘年

王典常 庠生家僅中資人品端方設教里中凡四方來學者不受分文弟子中有貧
乏者輒給筆墨書籍成就甚多

周維則 字永思庠生少失恃乳於嫂及長事之如母念嫂恩未報以己應得田二十
五畝半與姪慮後起爭端將分單呈縣蓋印邑侯奇之嘆曰報恩仁也讓產義也可
以風矣孫文重見選舉志

周文彩 字昭齋忠厚和平遇貧囊周之無儲色嘉慶十八年大饑每食必召里中餓者分食之一日召某食不至詢之知其父卒不能具棺將藁葬文彩曰汝父卒胡不告爲買棺以葬

周彩如 字宣五太學生忠厚喜施乾隆五十一年饑日以粟數石食餓者里中積欠悉焚其券

司 彪 子獲壽附 字文蔚篤義行乾隆五十年饑罄家糧以貸不給復糴穀以濟之

子獲祿能承父志爲王氏姊置田五十畝以慰親心有馬姓茹姓負債多金悉焚其券獲壽周益憐貧有父兄風

馮 汶 字在齊忠信鯁直仗義疏財

于克念 字作聖性仁厚收養從兄弟數人并孤貧族人爲之成室里人嘖嘖稱之

劉柔遠 太學生字定齋劉先十六世孫慷慨好施有佃戶羅姓家患瘟死者七人皆給以棺并予地葬之

魏作舟 性慈善乾隆二十一年歲饑積穀十餘石散給貧民有償者不受

馮大勇 庠生慷慨尙義兼有膽略

李元愷 幼寄居尉氏路拾包袱內藏數十金後有程氏找尋原數畀之

鄭鳳鳴 廉潔好善居壺瓶嘴當溱源下流爲滎汜孔道每水退苦泥滓架木爲橋以便行人又蓄風藥救小兒無算

黃天經 字孝常樂善好施建家祠修宗譜出鉅貲爲闔族先嘗曰吾家貴顯不及前人惟尊祖敬宗展親睦族使大本無虧亦持身保世之要道也

張世榮 立品清高兼精岐黃多製方藥求無不應濟世活人既不索謝亦無德色

鄭鐘齡 乾隆丙午饑疫死者十五六鐘齡捐貲賑救全活者百有餘家後挾資赴邠
逢邑人逃荒者扶老攜幼觸目傷心即捐金畀之以空囊歸

王耀先 字振聲太學生乾隆四十三年大饑散粟賑鄉里凡借貸無力償還者悉毀
其券

王克良 字繼聖天性敦樸重義好施村西有赴榮要路崎嶇難行克良砌石路二十
餘磴至今便之

陳耕 字耨齋孝友廉義望重一鄉

宋元 十歲時歲饑爲舅牧羊舅爲訂宋姓女爲婚元知係同姓不從舅強之怒曰
豕狗之事我不爲也事乃寢童年守義人以爲奇

宋琮 字子璧慷慨好義施地甚多觀音堂爲東西孔道舊無集市居民遠遠過客

數被劫掠踪於雍正三年商之鄉眾具稟立案移采家寨集於此又於集東穿井二十丈得水甚旺眾皆便之又捐修懷慶薄壁鎮山路並石橋一座商民立石誌之晚年焚萬金賬目有償者堅辭不受

孟賓 字客卿正直無私好義輕財嘗以歲荒買僕婢後皆贈金遣還

周殿元 太學生城北八里廟乏水行人苦之捐地五畝施茶水焉

岳禎 子德海附 性仁厚收養族姪德江分給產業俾立門戶子德海重義輕財能

承父志有族兄私成自外歸收養之娶妻生子共鬻二十餘年後分與地七十畝莊一區

郭天行 仗義疏財歲凶捐貲賑濟本村又於道左炎夏施茶以惠行旅

楊道盛 字德茂岸生與高景揚爲鄰高死妻閻氏無依收養之殯葬其夫擇其近族

老成者爲之嗣歲給薪米後閻氏以節終道盛成之也

李植 天性醇厚素以孝聞而扶危濟困不可枚舉嘗捐地十畝施茶以便行人

張永泰 太學生性好義凡興廢舉墜事輒爲倡首人有急難周之惟恐不及嘉慶十

八年大饑有鬻女者瀕行母女痛哭永泰惻然以錢贖之泣謝去次年麥後登門償

還辭不受

周 軻 字汧川太學生孝友好施精岐黃延請輒至不受謝

王國璠 字煥若貢生爲文得先正法設教義塾十八年門人貧乏者俱其紙筆成名

者甚衆

錢青錢 字淑阜太學生慈祥好善施田開渠引月陂諸泉灌田五百餘畝村中賴以

富饒

張檜吉 字聖植太學生事親養志兄弟怡怡聞於鄉里僕女數人有欲買爲妾者許百金笑却之曰此亦人子也吾豈因以爲利哉悉嫁良家不受聘儀

陳本良 字秉彝性醇厚事繼母孝嘗於路拾布疋經月餘有李某來認悉與之

張景陽 字又若附監生慷慨好施設教里塾十餘載來學者不受脯金族鄰貧乏者時周恤之

崔登岸 好善樂施戚陳姓孤苦無依收養數十年去之日爲置田數十畝莊房一所
陳大謨 字顯功太學生事繼母孝尤善瘍醫施藥不受值不憚勞買藥無資每以家人紡績錢益之

張 瑒 庠生重義輕財有榮人李姓赴大隗鎮羅麥蕩其資不敢歸夜宿自縊瑒救活之與以麥資乃還

呂律 字參六好義舉建惠行橋身董其事

黃天池 字鵬南以孝友聞施財不吝里黨賴以舉火者常數十家

金標 精痘疹捨藥濟人或以其貧難之標曰凡人行善視吾力所能爲安得以貧自謝乎行之愈力

馮慕臣 字念菴太學生嘉慶癸酉密大饑首捐銀百兩穀百石錢七十千以爲倡

王漢 輕財好義施藥濟人有不足破產爲之無吝色

陳清化 字召棠增生幼遊學新鄭拾布一捆十餘疋錢一千有王姓找認立與之晚年舉約正抄聖諭廣訓徧送里黨朝夕勸諭訟端以息又著指迷集徵引古訓以爲

治家者勸

王加照 字順天性任恤嘗收養族中孤姪爲娶妻生子後析產與之

吳九成 字心韶，倘出路有遺囊，貯錢數貫，守於路旁。日暮失者，不至攜囊歸。粘帖告白俟失主來付之。

王廷邦 字建侯，性愷爽，少孤，事母孝，折券不責償者數百緡。壽七十，有七子孫蕃衍，家屬六十餘口，五世共爨。

石大林 忠厚老成，孝以事親，家人化之。五世七十餘口同居，無間。

李天篤 少育於叔母，比長，事叔母如母。五十餘年，如一日。比鄰有郭姓者，歲荒乏養，日給口糧，全活一家。

王玉臨 字聖瑞，素尚躬行。乾隆間，黃水爲災，價買一僮，年餘詢知其人，無兄弟父母，年逾五旬，厚資而遣之。

張彬 太學生，邑大饑，施財濟物，賴以舉火者十餘家。有從弟妹孤苦無依，收養之。

爲謀婚嫁給田產人稱爲張善人

王克明 庠生安貧樂道有長厚聲內兄傅祥雲遊京師死焉子幼克明走千餘里迎其喪歸

錢

言孫理附

七歲失怙事孀母孝勤儉起家好善喜施膏焚券四十餘紙近村橋

梁寺宇倡義鳩工言之力居多孫理重然諾敦任恤爲鄉里典型

路 坦 字平子素明醫理活人無數施藥物不受值鄉人感之

孟祥義 字方亭好施與收養慕姓子爲成室焉又馬姓子家貧婚娶維艱出資玉成之 以上舊志

周蘭蕙

子宗濂附

性孝友好施與鄉里貧乏者年終按人給粟登之簿記來歲如其數

如是者幾二十年鄉人德之子宗濂附貢性嗜學昆弟析居田產什物以美者讓弟

後任商水教諭年逾花甲無疾而逝

楊萬輝 太學生好義急公於磬石寨下開渠五里餘引洧水灌田又創造水磨水碾

人利賴焉

鄭宗

元彥

兄弟和睦五世同居家饒裕好施與石嶺寨寨周圍施地四十餘畝捐貲七

千餘緡父老至今傳頌之

周運隆

太學生嘉慶十八年歲大饑捐穀三百石以食餓者全活甚衆邑令匾其門

王 諱

太學生性嚴正有幹材嘗督修檜陽書院及惠政橋急公好義不辭勞瘁上

憲旌其門

周善元

字冠三樂善好施村人貧不能婚娶者輒飲助之祠堂地址狹隘復捐地數

十丈闔族稱頌焉

王致麟 格正子字定侯太學生以城功保巡檢六品銜管理賓興局組織詠霓館修
祠宇設義塾善難枚舉後因鹽劬加價首先抗爭遍訴大寮鹽價復舊雖破產不惜
也鄉黨慕其懿行爲之樹碑子葆誠增生荷誠歲貢

鄭益修 字敬之監生以忍治家六世同居長幼百餘口無不敬畏光緒丁丑歲大稔
施棺木四十餘具設教里塾不受束修兼精岐黃活人甚衆

劉榮光 字瑞徵公正兼介光緒三年歲饑捐錢三百千助賑又置義地三畝爲貧人
葬地

孟謙 字六吉監生矧窮恤寡修橋補路捻匪擾密賊至其村相戒曰此孟善人家
勿驚也閭村得保無虞

徐鏐 字曉晴捻匪亂施地捐貲倡議修寨督衆晝夜加工不踰月而成後屢遭寇

警卒保無虞

王鼎奇 字奠九歲貢高才能文教人多所成就捻匪之亂推新寨寨主約束嚴明閭
寨賴以安全

盧鵬萬 附貢性謙和樂善好施嘗捐貲助修松泉書院鄰里稱貸概不取償有長厚
之風

王化光 例貢衆推新寨寨主捻匪犯密與官軍戰於雙樓官軍失利匪徒四出剽掠
入寨避難者數百家化光晝夜防堵得保無虞

梁鳴

鵬

鵬字肅廷三品銜賞戴花翎性忼爽有幹才邑中開路辦賑協濟諸要務多

資其力又倡建松泉書院嘉惠士林從弟鳴鵬太學生急公好義凡松泉書院事無
不盡力爲之

于甲弟 庠生與兄科第友愛甚篤兄歿析產任嫂擇肥視姪如子後辦本保公事正直無私輿論翕然

鄭雲路 太學生事母以孝聞捻匪之亂與盧鸚秋同爲大隗寨主竭力防禦閭寨賴以保全又輕財好義人有以索債啟爭者輒傾囊代償無吝色

鄭宗成 嘉慶十八年歲大饑輸穀三百石助賑貧民無籽種者悉付給不索償邑侯匾其門曰樂善好施

鄭宗舜 和平忠厚遇人爭必曲爲排解家僅中產而外欠穀麥三十餘石悉焚其券不索償壽八十有四而卒孫逢辛廩生

呂金山 字南閣候補巡檢諳練世事勇敢有爲辦公數十年勞怨不辭光緒三年歲大饑兩次赴省請賑得數千金又勸富戶捐助活人無算時匪徒暴橫搶劫無虛日

自備貲糧養勇數十名設法勦捕盜賊欽迹繼母失明禱諸神願修各寺廟以祈神佑工竣明復如初僉謂孝心所感云子林鐘大挑知縣追贈奉政大夫

翟汝霖 字用夫庠生學問淹博教人以躬行爲先尤敦族誼有堂叔失業迎養終身歿後割己田爲之取嗣以子允之貴誥封朝議大夫

陳復興 字詩卿候選布政司理問慷慨好義石板坡爲城東孔道犂确崎嶇行人苦之爲捐修石路數十丈又捐建松泉書院嘉惠士子光緒三年歲凶出穀數百石助賑子四次其炯任新蔡教諭

張允忠 字誠齋遇事敢任捻匪之亂爲和合寨主糾衆扞禦卒保無虞辦公多年勤慎無私精醫術全活者不計其數

陳有林 操計然業值歲凶有鬻女者已受價矣母女痛哭不忍離詢之知女已字人

因貧爲婿所棄有林曠作義女後其婿歸以女還之兩家感德共匾其門

周廷彥 字俊卿八歲失怙事繼母孝昆弟析居田產置不與較計前後所讓約千五百緡鄉人稱其長厚

王培之 字維楨歲貢捻匪擾密爲磬石寨主督率丁壯晝夜守禦數萬生靈得無恙
張 灼 字見三附貢事孀母極孝鄉里借貸有不能償者輒焚其券素精岐黃貧人服藥不取值亦不受謝辦公數十年正直無私人皆重之

申國拔 輕財好義有汜水人申曰福者挾醫術遊密國拔以別墅贈之署券不受值其慷慨如此壽八十有七而卒孫麟祥庠生

申長發 無胞兄弟有堂弟二析居時長發當得其半慨然曰吾不忍獨豐也按三股均分之

王繼昇 字平甫性慈善昆仲四人故者三遺三姪撫之成立一如己出又善治痘疹
不索謝八十有六而卒

李明新 太學生好善樂施姊妹貧乏常資助之夏月施茶於道以便行旅有友人婦
亡遺一孤女收養成人擇嫁儒門

路鳴鶴 精醫術無貧富邀之即往每年終藥債有不能償者具冊焚於路又施地五
畝於超化南爲貧人葬地

李 坦 字舒菴業瘍醫有丐者疽發背坦給食療治不厭其穢其人銘感終身曾孫
克誠克明均貢生僉以爲陰德之報

李 倫 字敦五績學未售析居後兄蕩產復以己田十五畝宅一區畀之

梁光臨 太學生好義舉嘗於梁溝捐地四畝爲夏月施茶水之費

錢應選 字慰蒼武庠生屢修超化橋梁又施地五畝以助義塾膏火壽登九十有三

馮光著 太學生道光二十七年大饑傾倉賑貸村人感德匾其門曰睦嫻任恤

陳大敬 字惕若乾隆丙午密大饑捐穀煮粥以食餓者有死者施棺木掩埋之

盧西庚 字夢白太學生豁達明爽好施與凡有乞貸無不應付善岐黃延之者接踵

於門不憚煩勞子驥雲舉人見政事門

楊宗溥 字小旣彤如子也有才幹由瑞昌知縣告歸辦本城公事公正無私捻匪將

至守禦有方合城賴以無虞

梁書琴 太學生好施與於甘寨置地十餘畝助義塾膏火

于廷璐 字公佩庠生端謹自持理家嚴而不刻男婦七十餘口五世同堂尤好周急

恤貧負債不能償者火其券鄉里稱之

施景泰 字際盛太學生性慈善有族姪女孤無依資粧嫁之族中老病無業者供養之歿則爲具棺木以葬

李景襄 輕財好義以石門爲禹密孔道施地四十餘畝建設茶菴又於周崗西偏置地二畝爲貧民葬地修築車路助銀五十兩嘗拾孫姓金聞即璧還之壽登九十有

三

陳玉書 性慷慨急公益捻匪之亂登密合兵堵禦糧餉不繼玉書竭力供之事賴以濟又倡修張溝寨承雲山寨以衛一方之民

劉元吉 性忠厚不與人爭光緒丁丑歲凶族衆餬口無資謂元吉曰吾地售之頗難汝地鄰富人可售汝田以活我歲轉即還也元吉鬻田二十畝分給之其後無一還者或以爲言元吉曰往事也笑置之

高正 於超化南施地六畝備茶水以濟行人

錢萬中 字景鷺事親孝待姪如已出解難息爭鄉黨宗族咸依賴之辦公多年毫不染指輯有歷代名將傳四卷

王雲衢 字勵升增生有幹略擒匪之變糾衆築浮山寨晝夜督工不辭勞瘁調度有方鄉民賴之

王龍光 字錦章庠生敦宗睦族不吝貲財嘗施地於如堂廟及靈泉菴等處鄉里目爲善人

陳修偉 字俊卿品行端方治家有法男婦九十餘口和而能敬敦宗睦族號爲義門
趙中和 字建堂太學生慷慨好義遇事勇爲光緒三年邑侯委辦茶菴粥廠又嘗監修路工均能實力奉行精限科延聘無虛日施藥療病概不受值鄉里德之

馬國棟 族弟早死遺二子家貧無養收恤之為成婚畀田十餘畝使謀生理

岳文明 少失怙恃弟與妹皆幼撫之有恩稍長為謀婚嫁弟與妹感其德事之如父

焉

岳文觀 太學生少孤育於兄嫂後析居特除地十畝以報養育之恩居鄉急公好義

守正不阿人皆愛而敬之

常二頭 幼孤貧負販為業事母孝及長家漸阜負債者數百家咸豐間匪徒入村身

被重傷自知不起遺命災券既歿子如其言鄉人咸其義刻石表彰之

周鳳岐 道光丁未年饑人多流亡捐穀百餘斛賑之

趙連城 子漢雲附 少孤貧竭力奉母色養如成人及長販麻為業家漸亨喜施與里中

不能自存者輒調恤之子雲漢能承父志光緒庚子年饑助賑捐穀四百餘石

馬學明 字熙甫熱誠敢任事擒匪犯密時河西馬曲梁同心三寨同時修築學明一身督理之秉公任勞剋期告成一方均受其福

馬百昌 字文星性和易胸無城府治家有法男婦百口無敢譁者有童孫嬉戲道旁適王姓車逸悞斃之兩家素不諧王大恐百昌抱孫歸未嘗出惡言人服其德量

周相友 胞叔家赤貧爲購田十二畝宅一區贍養之又好施濟施烏金丸藥數十年

王敬元 字善長與諸叔析居出產悉讓之年饑諸叔乏困復典衣資助凡親鄰有貧苦者周恤無所不至子逢甲甲榮均廩生

王章慶 性友愛妹適曹貧無養攜家寄食章慶與家人曰妹亦弟也財產何吝焉待之無失禮

王樹屏 字建侯太學生輕財好義光緒三年歲大饑族中議賣墳柏藉以過活樹屏應得錢百緡悉讓諸弟又懷商劉某在禹病歸路經界牌村病歿樹屏贈給棺木川資遣歸人咸義之

王維哲 字溶之例貢光緒戊寅歲饑道殣相望施義地收葬之

錢福堂 性溫和寬厚待人隣里親族貧乏者周恤無德色尤善解人紛爭至今頌之

陳心銘 性端謹持家有法七世同居門庭肅然有義門之風

賈廷元 急公好義村臨漆水冬春多泥濘行人苦之廷元架木爲橋以濟行旅殆五十年

周修林 字純齋生有至性見義勇爲光緒丁丑歲大饑捐貲賑救全活者數十百人

有禹縣王姓者乞食來密鬻其妻於某有成言矣修林聞之惻然爲之贖還夫婦完聚

劉天恩 少赤貧母寢疾妹甫三歲父外出竭力供養菽水無缺後家漸裕妹適人貧甚時周恤之有鹵商卒於寓遺一幼子具棺瘞商並收養其子俟成人送回籍

王聚 田家子早喪父叔撫養之後析居憐叔遲暮且感其恩祖業悉讓之聚自謀生理勤儉孝慈人皆愛重之

張雪亭 義僕也傭於王維哲家四十餘年少主人夫婦相繼歿遺孤三長九歲次六歲又次三歲雪亭晝哺養夜懷抱辛勞備嘗少主賴以成立人皆稱之

于廷鑑 性豁達饒於財嘗捐修松泉書院暨石板坡孔道好義急公裨益甚多

田光三 武庠生天資樸實守正不阿嘗與友爲人了事事後及索謝光三聞之登門

詬訾遂與絕交其介如此

朱景海 嘉慶時歲大侵飢民待哺捐穀十餘石以濟貧乏邑侯嘉之旌其門

錢學山 太學生輕財好義嘗捐貲建文昌閣施地建景賢祠又以水利攸關捐月陂地址導水灌田村民賴之

錢大勳 武庠生好施濟遇貧不能婚葬者輒傾囊助之行旅將某遇盜傷足撫養數月愈後使行

陳文若 庠生性慷慨遇人有急難周施不遺餘力人多德之

馬惠芳 柳河村人於曲梁寨門外募建石橋三處施地五畝作歲修費勒石紀之

周豐年 字壽人性忠厚嘗以粟散給貧困鄉人頌之

鄧東壁 素有長厚稱析居時田產任兩弟自擇自以教讀嗣且終身友愛不衰

孫宜振 家饒裕好讀書遇文士識與不識必曲意款洽寒士遊學無資者輒俵助之
歲饑買鄰人地二十餘畝後令傭工一年悉還其地子克昌黎昌均邑名士

王不觀 武庠生家饒裕嘉慶十八年歲饑措鉅款雇車運糧以濟饑民全活者不計
其數邑宰聞於上保守備銜且旌其門

王宣猷 字仲辰歲貢有文名與姪析居任所擇不與較修節孝祠革鹽商積弊均有
力焉

周玉印 爲在坊首事鄉里推服嘗捐地五畝施茶於八里廟行人感之後以城工保
六品銜

郭殿元 字鼎三太學生性豪邁能任事邑修關帝城隍廟暨節孝祠皆身董其役又
同修八里廟石路光緒間兩次襄辦賑務不負委任以功獎縣丞兼五品藍翎

韓泰華 邑侯杜修密城監工出力又捐貲鐵塞城門六扇獎六品銜

王裕基 樸實務農善居積光緒三年大饑捐錢二百千以助賑貧民賴之

徐文照 施捨義地瘞埋餓殍邑侯匾其門

王肄三 太學生字官雅事親孝性尤慈善嘗以己田三十餘畝爲從堂伯立後鄉里

義之

王思敬 太學生有應事才嘗以漕政積弊破產上訴卒得直民困以甦

趙炳元 子學道附 字燦斗歲貢倡修皇古寨與榮邑孫師竹同爲寨主保障一方豪黠

私抽銀花稅抗訴得免又嘗監修砲台幫辦賑務急公好義人多稱之子學道接辦

公事守正不阿綽有父風

郭臨溪 附貢性孝友與弟長凝同塾謂之曰家事吾自任之爾當專心攻書以成父

志弟之顯榮臨溪力也尤善解紛人有爭端得其一言事即寢捻匪之亂倡修張固山寨居民賴之

郭大穰 太學生富而好善遇貧苦無論親疏悉周恤之辦公多所賠墊嘉慶十八年大饑人相食有匪徒盤踞八里廟肆行劫掠大穰過其地爲所縛將殺之有識之者曰此郭善人也釋之

蔡永清 幼清貧貿易爲生兄弟歿以舊產悉與諸姪曰我尙能再置也自奉儉約待人從厚有乏困者輒資助之

孫餘慶 字少亭陝西驛丞才智過人在任多所建樹邑侯祝倡修官道延爲監工措置得宜城關橋梁兩次捐貲重修行人便之

周 鄭 太學生性仁厚施地二十餘畝爲院青保義塾之資其地糧漕仍自行完納

李大慶 年饑餓卒載道施地瘞埋之

韓步雲 庠生粵匪入城毀城隍神像步雲倡捐重修捻匪擾密捐貲招勇督辦團練

以功保舉布政司理問即補清軍廳

陳中林 熱心學務光緒丙午捐貲數十緡子母相權借充本保學校經費

韓泰剛 太學生慷慨好施皖匪犯密捐錢數百緡以助守禦

魏曰醇 捐地十餘畝創設茶菴行人便之

張科 於土保山神廟前捐地十四畝施茶水以惠行旅

武文 係文 貢生襄之子也嘗施義地設義塾光緒丁丑歲凶捐穀百二十石助賑又於

鄰里乏困者按戶周恤人感其惠以積善餘慶匾其門

韓宗魏 太學生捻匪之亂因防禦出力奏保六品銜以縣丞用嘗開恒泰錢莊閉歇

時有負欠者舉券焚之

劉恩元 庠生好義輕財負欠者焚其券不責償嘗設教登密間賴以成名者甚多

蔡玉堂 庠生設教鄉里成就後學嘗創修家祠十餘間置祭田五十畝設義塾以惠

寒酸土匪犯密糾衆築寨居民恃以無恐

施廣慶 景泰子以孝友聞設教里中循循善誘兼精醫術好施與有負欠者焚券不

責償以嗣子春膏貴封中憲大夫

李百旺 登仕郎道光間捐資重修米村北大廟同治元年復獨修西窰寨種種義舉

鄉里稱頌

李延宗 性恢廓有分辨嘗拾遺金三百兩失主詢及慨與之

李應五 候選縣丞邑侯祝倡修官路捐資二百緡光緒庚子襄辦賑務悉心經理全

活甚衆

丁憲章 太學生忠厚喜施捻匪之亂避難者多寓其家悉收恤之無德色光緒丁丑歲凶村人待以舉火者數十口戚黨有貧乏者畀田以養之鄰里稱道至今弗衰張文科 太學生通醫術遇貧而無力者輒施藥餌不取值有乞人子患痘求醫收養之愈而後使行

李之牧

子西雖附

武庠生精內外科好施藥餌於貧人尤加之意子西雖仰承父志施

入祠堂地二十五畝

孟朝典 字慎五性謙和善排解土匪犯密衆推爲米村寨主募丁壯繕守備衆賴以

安辦本保公務正直無私邑令杜稱爲闔邑領袖

李延錫

子同濬附

貢生捻匪之亂管捐資修米村寨憫本村什紀差苦施地積款充伊

公費有族姪家貧爲納婚授室光緒三年歲凶散財濟急全活者衆有死者輒瘞埋之次子同濠精外科施藥濟人毫無吝色以什紀差費不敷仰承父志施地六畝附益之

寇司勳 篤學勵行設家塾村人來學者不計束脩其訓蒙以力行爲主從遊者率循循有規矩焉

陳清 子國賢附 家世忠厚能忍讓終身不與人爭子國賢熱心辦公屢襄義舉一門

六十餘口和而能敬有張公藝之風

周玉璋 太學生品行端潔樂善好施嘗倡捐重修卓君廟邑侯楊題額旌之

鄭鳳鳴 太學生修身教家均有秩叙七世同居男婦百餘口和睦無間言

張會心 太學生貧而好義兄早逝遺孤二躬親撫養不異己出後置田四頃餘生一

子命與二姪三股均分鄉里稱之

鄭相臨 庠生廉介和平熱心公益嘉慶中與修縣志採訪精審物論歸之孫翔清際清均有孝行終身式好無尤

王振朝 慷慨好施鄉里咸懷其德道光間上憲旌之

丁宗文 性孝友弟貧無以爲養以己產資助之居鄉忍讓有長厚聲子亥斗庠生

魏樂三 忠厚好施光緒丁丑密大饑捐粟百餘石以賑飢民事聞獎五品銜

陳汝德 兄弟析居分多潤寡姊適王氏貧無依給田供養之姊歿代營殯葬原業收入祖塋充祭田焉

丁明 太學生有遠族家貧如洗與田數畝使謀生計後爲窮所迫迭經典賣明屢贖還之始終無德色卒年九十有一

丁俊 性豁達喜施濟捻匪犯密避難伊家者數十百口俊指困推食毫無吝嗇事
平有報德者謝弗受卒年九十有四

張文楷 性嚴正持家有法待人忠厚子弟悉令讀書後列膠庠者五世不絕人以爲
門庭之瑞

朱惠霖 字振之五品銜事父孝年逾花甲奉晨昏爲孺子慕光緒丁丑歲大疫自葉
返里沿途施餓者傾囊不恤其他助婚葬救乏困事難枚舉孫煥堂以廩生舉孝廉
方正

周燕卿 字賓亭廩生幼嗜讀事父母色順弗違遇人急難不惜傾囊相助學行稱於
遠近

陳修簡 太學生善醫術有延致者雖寒暑雨雪必往遇人有釁端反覆開陳必事平

而後已人多愛而敬之

朱宣文 太學生公正有氣節好息事寧人遇事有不平者抑強扶弱每以正言折服之
侯觀林 和平端方七世同居人無間言

翁國華 襄城人任本縣城守營後置產入藉咸豐間兵荒交迫死屍遍野國華憫之
於城外購地六畝施葬地並修白骨樓以慰游魂

王和 性忠厚多義舉嘗捐己地倡建土地祠保障一方子恒昌亦有父風

文學

清

韓繼文 字紹之崇禎時舉人少孤貧孝事寡母勤苦力學明季流寇屠密繼文被刃
仆地忽尸叢中作人言曰此善良舉人勿殺賊驚遁獲免後子孫蕃衍書香累世爲

邑望族

鄭際夏

按孫徵君年譜作鄭有四誤

字有士篤於躬行不求仕進兄際虞勸以顯揚曰爲學

自有顯揚處何必功名也與睢州湯潛庵登封耿逸庵中牟冉永光濼城趙寬夫本邑錢升階先後受業孫夏峯之門得理學宗旨徵君年譜云密邑鄭有四來學即其人也

黃在中 字驪山本姓彭少避亂至密黃氏收養之因改姓焉性好讀書不問外事行路必袖書偶憩則朗誦家人進食方觀書誤及研硃濡口不覺也人多以書癡目之後以舉人司鐸舞陽能稱其職

錢佳選 字升階標之子康熙乙未選拔爲人醇和簡默孝親而樂道受業孫徵君之門闡明程朱之學常正襟危坐雖盛暑不去衣冠時同社嵩陽耿介上蔡張沐泗上

翁深灤城趙御衆諸公往來其家久敬弗衰超化遂爲人文之藪

韓完 字伯成一模子雍正丙午舉人姿性穎異攻苦歷寒暑不輟坐下足著兩磚處皆穿奉親色養兼至親歿哀慕終身以丁巳明通教諭溫縣課勵士子增修學宮年老告歸一馬一僕身無餘貲其清介如此

楊權 字時中恩貢以理學知名

韓元燾 字浦庵廩生杲之孫也少孤事母孝好讀書識解過人邑令于公推重之歲大饑有欲掠食富家粟者燾爲陳說利害散其徒衆事獲已多所保全子壇塏墀俱庠生塏城俱舉人時人比之燕山五桂

趙執桓 字上公聰穎有器量讀書不屑章句由廩貢任學官勤考課整士習釋奠讀法必誠必敬所在有賢聲

馬星度 字序柳副貢少嗜學寒暑不踰門限明鼎革懷書避亂少休則出書朗誦比長受易於族兄鳴鸞尤篤嗜之遂潛心河洛之學精研二十餘年悟其要旨著周易暢言十餘卷

魏陳象 歲貢字代繩侯之孫詩古文詞皆擅長片語隻字士林寶之

李曰乾 字大生舉人少孤貧嗜學篤愛弱弟與人交然諾不欺

黃 溶 字春波以明經任修武訓導性嗜學不問外事熟於史傳每同人聚會論証古今上下千百年若河決下流而東注所教士多獲雋

魏一韓 字開西歲貢幼家貧服賈養親暇則手不釋卷下筆爲文伸紙立就屢試冠軍文壇推之詩宗白樂天有真趣

王六吉 字允謙善屬文得先正法設教里黨曲成後學門人家貧者每資給之後以

明經司訓內黃凡童子家貧不能延師者皆令入署與諸孫共筆硯一時雷教澤者甚衆

韓一楷 字式南以明經司訓河內書理精邃尤樂汲引後進

錢慥 號東崖恩貢性至孝常舌耕羣洛間聞母訃痛絕復甦鬚髮盡白日夜馳二

百里足腫如繭持喪哀毀幾至滅性屢試不售絕意進取作小墅栽花種竹別有洞

天杜門教子以詩酒琴書自娛詩文沈鬱頓挫凌轍古今有一梅園詩集

黃居中 字中函增生氣韻高雅構屋數楹繞以花木日坐臥其間披覽古籍摹臨名

帖垂五十年不倦行楷書皆有法度學者珍之嘗施義塚棺木被澤者甚衆

周永錫 子徽熊附 字爾極庠生六歲失怙事孀母甚篤與弟永言相友愛族叔佑貧甚

以地資給之善息親族爭端好誘掖後進結社爲文貧者助以膏火洎濱諸士多賴

成就子徵熊字元卜性沈穆威儀自攝尤重信義以副貢教諭襄城能勤其職

馬延祺 字伯修性醇謹事親孝親歿盡禮好學不倦尤精於易著有易經四書講義

藏於家

韓發 字子振家貧父以佃爲業發隨力作暇則讀書數年得入泮與人交有始終
生平一言一笑無少僞飾

慕韓 字小韓廩生博洽淹貫著有四書講義授徒善爲啟牖多所成就

錢九府 翻 九府號南浦由舉人補國子監學錄孝友剛方學問淹貫工詩書畫亦爲人

所珍重與弟九韶並名重一時九韶原名九同字太和號南溇歲貢少穎慧日誦數
千言出語輒驚其長老及長又名大噪尤長於詩賦陳未齋宮詹程魚門太史皆同
聲嘆賞五旬後絕意功名與兄南浦飲酒賦詩極壙篴之樂主講檜陽書院多所成

就生平著作甚富惟南渚詩賦文集已付梓其河嶽集研來齋雜記等書皆藏於家

楚 灃 字江波行方志潔步履端詳人有過輒而規之族黨中皆嚴憚敬服授徒里中從遊者學舍不能容以歲貢司鐸孟津時年已逾八旬課諸生猶必作文示之

楊貢瑤 舉鄉飲賓以耆德著士人多沐其教澤

周 捷 字南宮貧而好學賣柴爲生負薪赴市誦讀不輟年四十八始入泮性孝友凡事以身先之門庭之內訢訢如也

周 式 字天培庠生事母孝性介善書法片紙隻字人皆珍之

李永昶 號蘭山嘉慶辛酉舉人學問博雅書法過人四方知名之士多出其門

蔡 靖 字正夫副貢品端學邃教人以理學爲宗著有待叩錄等書

王淑顏 貢生字心齋孝友醇篤教姪若孫均有禮法嘗講白鹿洞學規西山先生良知詩曰此爲人之要須臾不可離也病劇誦陶淵明聊乘化以歸盡樂天天命復奚疑二語少頃憑几而逝孫昌齡字彭年嘉慶辛酉舉人品行端潔學問優長遊其門者率循循有道學風著有密縣志補遺又嘗徧徵貞石詩文欲葺亭覆之不果而歿

張垣

子基年附

貢生字熙止孝友寬仁好學不倦嘗有盜入室家人執跪階下垣曰

窮民耳遣之晚年好歧黃病者投藥輒效子基年增生有文名亦精醫術

傅一經 字子授恩貢績學敦行兼精醫術

錢永齡 字又彭庠生學紹濂洛文宗王唐

王銓 貢生字遴卿敏而好學事親色養備至及歿親親遺物輒泔泔淚下著有植

槐堂文集二卷詩集一卷藏於家

王曰焜 躡躡名場絕意進取晚年老究遺文參核古禮爲閭里典型與人接直諒和
易終身無忤物之色

陳 博 字廣聞庠生文行交飭忠恕待人里巷有相爭者反覆開諭靡不愧服

馬朝聘 字君選庠生著有崇實錄論語講義周易正義諸書又精醫術著資生靈通
五十七卷

孟 津 字星源性遲鈍好讀書嘗以索解不得憤欲自經經救得甦由是志益勵旋
入學食餼晚年學極富士林仰之其教人以身作則終日危坐毫無惰容

朱佐清 字輔公庠生好學家貧無油焚香照讀終夜不輟兄弟析居曰詩書從吾好
田產歸兄弟里人義之精醫學卜筮如神嘗語其子曰吾年七十有七當以癱終果

如其言

王清字介亭家徒四壁糴糠不厭慕薛文清王陽明之爲人以克治自勵不規規於章句之學雖應童子試於得失淡如也授徒二十餘年多所成就以母喪哀毀卒

韓城 塽字秀夫母病劇一晝夜鬚盡曰因以孝聞性聰穎書不再讀皆能記憶十四歲入庠旋食餼五旬餘始領鄉荐授徒因材善誘知名士多出其門與人交忠厚和平藹然可親又精堪輿擇地建文峯塔密縣文風爲之一振老年手不釋卷即扶杖逍遙吟咏不絕焉弟城字哲夫乾隆辛卯舉人性孝友童時爲文即見賞於秦大尹陳宮詹及長名冠一時尤工書字蹟流傳爲世家所寶重三主檜陽書院提倡士林卓有成效後司鐸鹿邑與諸生談詩論文娓娓不倦嘗以病乞歸諸生集明倫堂者百餘人再三懇留乃留二年部推知縣不就退居邱園構書室數楹課徒教子孫以終

李元滙子雲附

字舒園號鶴坪以舉人司鐸汲縣擢湖南清泉令有政聲少銳志績學

閱覽強識尤工詩在署稍暇吟咏不輟生平著作甚富有鶴坪詩集滇海聯吟香雪亭吟史彙行於世子雲亦登賢書能世其業

張森吉

字列璋生而穎異善屬文又精歧黃親疾製方竭情盡慎父病篤日夜不離

側鬚髮盡白以舉人任光州學正崇文教勵士習嘗勗人曰讀書須躬行實踐美言欺人德之賊耳

郭達

字伯羽以舉人任真定同知性孝友治家有法居官以清慎著幼聘姚氏未

娶而瞽達人泮女家議退婚達謂父母曰既字我即我妻也以失明棄之不義遂完娶之後生六子兩沐褒封

陳景楷

字聖林增生博古通今學問優長教授里中悉遵白鹿洞學規一時出門下

者率循循雅飭有士君子之行

劉永綏 字康侯恩貢性謙和喜怒不形於色晚年設教雲巖宮從遊者衆廟宇至不能容

錢克配 字育德有孝行家貧如洗藜藿短褐無愠色早歲入庠晝夜攻苦中年學益進四方成就學焉著有四書集義十二卷

錢可久 字萬徵庠生面多麻而性高潔不履市塵不妄交接工小楷清談高歌有晉人風味嘗得一麻子石題曰子貌如吾陋吾心似汝真箇中相賞處不與世間人其風致如此著有萬芝堂詩草

錢青簡 字史章聰穎異常五歲通孝經七歲能詩賦十三入郡庠性孝友過庭問禮之暇危坐吟誦經年不出戶庭著有竹堂小草其詠除夕句云喧傳柏酒人辭歲靜

對梅花我閉門論文云但將骨力存真體不假丹鉛媚世人可想見其爲人矣惜不
永年未大成就

牛文光 字星漢幼爲僧穎悟過人稍長攻儒書乃棄釋歸儒補博士弟子員研窮經
旨及近思錄諸書終身不倦

錢玠 字衛公威貢幼赤貧炊煙屢斷晏如也爲諸生時鬻餅採樵以自給而書聲
時達戶外後司訓夏邑粗粥淡齏分外脂膏毫不染指

周繩文 字憲章性嗜學手不釋卷後以舉人教諭羅山訓諸生務實行嘗曰人不識
孝悌二字讀書萬卷猶目不識丁耳手錄經史中有關倫常者彙爲一編時講勸以
示規則

陳光基 字心田歲貢績學植品生徒甚盛嘉慶十八年歲荒監視東鄉粥廠未嘗頃

刻離日食廠粥數甌諸子以餅餌進却之曰吾不忍食也疾亟以不得成事爲恨戒

其子歿即殮廠中俟事畢移柩歸其尙義如此著有汗齋文集藏於家 以上見舊志

陳

行栗

栗字寬夫光基長子也克紹家學每有著作輒出人意表嘗作懷石記鈞陽

馬時芳激賞之以爲久不見此真文遂相友善倡明絕學引掖後進嘗曰吾人爲學須從身心上著功夫時學不知多向別路上去可惜也著有強恕堂正續稿曾與修中州志語人曰吾愛好人倫遇孝子忠臣悌弟節婦極力表揚惟恐沒人之善至星野地理典禮律例諸門考據必求精詳其自信如此遊鄭最久後從祀鄭鄉賢弟行方歲貢友教四方學品畧與栗同

周訪禮 字履齋舉人天姿篤實品端學邃友教四方從遊者莫不循循有規矩晚年司訓彰德崇尙實學士風爲之一變

張耿南 字金吾舉人事孀母孝母老病每逢元旦默祝損己壽以延母壽如是者十年母不知也後母年八十餘病數日不言忽大言曰上帝憫汝損壽之誠爲我延壽十年今去矣遂逝人以爲至孝動天云後以大挑任虞城教諭屢主講檜陽書院士林多宗仰之子紹衣紹復紹仲俱貴顯

靳標嵩 字赤符廩生品學兼優善書法真草俱佳

張化宏 恩貢篤學敦品安貧樂道一時士林仰如山斗

張惠洽 字德孚舉人強記善悟讀書不屑章句爲文深厚宏博爲士林所矜式晚年好清靜以道自重每謂家人曰吾家隻字不入公門數世矣稍淪此戒即不孝之大者其家法如此

錢青山 字嵐閣拔貢儀容秀偉學有淵源爲文惟以名大家爲準的任魯山教諭兼

主講琴堂書院及門領鄉薦捷南宮者多人著有挹園詩草藏於家

張 煒 字蘊升歲貢任臨漳訓導九歲時披覽大學講義能默誦數千言比長究心

性理通書及古文詞諸大家文有根柢爲世所知名教人以立品爲先以養心爲要
著有省愆稿二卷志書稿二卷

張紉芳 字佩之舉人少好古文辭目覽手披無虛日及長學益富馳聲名場後教諭
洛陽文風丕振瀍東書院久廢捐俸倡修延師定課士林稱之

錢大競 歲貢字夏忱能文章尤工詩賦一時談詩賦者推以爲最教人因材而篤多
所成就所著西洲詩集膾炙人口

錢大詰 字申吉歲貢幼警敏未冠入庠旋食餼爲文沈雄渾厚尤長於古作有讀史
詩數十首慷慨激昂足見抱負設教河朔宛泌等處英雋之士多出其門所著有西

源詩文集傳於世

張體恒 字子權拔貢十歲讀小學即恍然有得弱冠後博古通今貫串經義持已教人有道學風精行楷求書者接踵於門晚年生徒日衆講舍幾不能容著有陰符經註解苕溪全集

錢培桂 字芳五歲貢才思敏捷文名藉甚司訓闕鄉課士殷勤人文蔚起壽八十有五無疾而逝著有諫果堂詩集

李芸生 孫元楷附 號修館舉人保舉知縣天資卓異文藝詩賦皆冠絕一時素有目疾

鄉薦後絕意進取管主講檜陽書院暨鄭州滎陽等處門下擢高科登顯仕者後先相望著有三可堂文稿行世孫元楷字正齋庠生性剛直豪飲能詩潔己自好舉孝廉方正年七十終於家

王化成 字恒豕舉人品端學粹清苦自勵疏食不飽晏如也歷主滎陽汜水嵩陽諸書院講席成就人材甚衆

侯之翰 字燕卿舉人高材能文書法勁健拔俗得柳誠懸筆意設教榮登禹密各縣門牆之盛當世無比

翟心銘 字盤若舉人陽武縣教諭爲人方正有氣節事親以孝聞清苦勵學教誨多術好施與鄰里有困乏者賙之不遺餘力人有侵其田畔者戒家人勿與校其人愧服捻匪之亂率鄉人築寨村北捐貲掘井獨力爲之

傅咸如 號虛齋舉人以大挑二等司鐸孟縣尋陞衛輝教授截取知縣學問淵博著有四書詳韻正字經典正字愚魯堂集諸書行世又有韻字通考七十四卷藏於家張念棧 字仲華拔貢性嚴正爲文清勁拔俗教人崇尚實學遊其門者皆確有根柢

成名甚衆值捻匪亂輟講修寨超化一帶得免於難季子麟炳庠生

楊藹如 字吉士以優貢任陽武教諭性高雅潔己自好尤長於詩賦年逾古稀與李

芸生諸名士爲延年社詩酒過從當時傳爲美談

張維新 字應遇天姿英敏讀書過目不忘茹古含今文名震一時嘉慶戊午舉於鄉

家世清貧絕意進取教授生徒多成立者子培佑庠生

王基繕 字愛廬庠生性耿介恭謹自持幼承庭訓學問淹博教人先品行而後文藝

遊其門者皆恂恂雅飭尤長於詩律晚年失明猶諄諄誨人不倦壽九十三而終

王致昌廣和均格愆子廣有才學舉人早卒昌號伴嵩廩生以城工保六品銜天姿超逸

有經濟才長於古文詩歌屢遊幕府爲當道所倚重著有修獻文鈔行世晚年司鐸陽武門下士以春風化雨遍其門壽八十有四和字子育恩貢性嚴毅善訓迪遊其

門者獲雋不可勝數後任鎮平教諭

王魁臣 字作霖歲貢西華訓導孝友端方行詣卓著爲文清真雅正受業者不下數百人當時密有四老之稱魁臣其一也子士陞庠生

張增

瑞

祿字荷萬聰敏過人八歲通十三經由拔貢領鄉薦挑取臚錄試用知縣事

親孝髮逆犯密堂上停柩未葬隻身守之不去後奉委監正陽關稅革除陋規商民欣悅及還中途遇寇男婦逃難者爲水所阻乃以己船渡之司鐸安陽奉委查本縣上控事破除情面卒革夙弊旋以匪徒擾境守城勞疾而卒瑞字雲舫恩貢少好學比長與兄齊名博學能文設帳授徒成名者衆後以廣文歷任孟縣汲縣息縣等處所在稱職三弟增祥見政事門

張居恭 字肅亭拔貢朝考二等絕意仕進潛心理學教授生徒先躬行而後文藝嘗

銘於座右曰讀書不在多知一字行一字知一句行一句方爲有用不然雖萬卷無益也平居潔己自好非義不取家貧無晚炊食炒豆一握飲水而已道光間授武陟教諭以年老辭不赴勸之者曰毛義奉檄而喜爾即無志利祿獨不爲先人計乎遂欣然就道接篆即請封典閱六月引病歸壽八旬卒於家

張書則 字貽穀歲貢候選訓導幼失恃兩事繼母無間言從大父受學博通經典後得理學宗傳一書著蔡奉之雖隆冬盛暑功無或間教人以誠篤爲先蕩檢者輒加嚴譴舉動恪遵禮法時人皆敬畏之著有四書輯說語錄摘要等書

李耀南 字應斗號岳間庠生經術湛深清潔自守教人循循善誘密榮之交文人多出其門生平慎取與重信義種種懿行爲鄉里所仰重著有語錄太極圖說及手批周易藏於家孫統一登賢書

霍文炳

蔚

均優增生學問淹博望重一時雖未登科第而文名甚著與張增祿昆仲齊

名時有三張二霍之稱

王雲峯

子國彥附

舉人博學能文宏獎後進孜孜不倦李芸生貧而好學苦無資雲峯

飲食而教誨之卒成名士子國彥副貢屢主講檜陽書院

王履中

字坦齋歲貢就訓導職幼性敏好學長善屬文詩賦尤極秀韻教授新密數

十年遊其門者多所成就生平語言遲鈍惟遇人有爭執恒借一言而決其爲人信

服如此年七十三無疾而卒

王致美

號篋塘拔貢天資英特文藝詩賦各擅其長友教四方從遊者多顯達蓋皆

得其衣鉢云

李統一

字定菴舉人幼聰穎從大父耀南受學文名冠一時性孝謹事親終身無違

咸豐末捻匪入村衆逃竄時耀南老病不能行統一留養不去賊憐其孝戒勿傷與鄉人處善解紛難人皆愛而敬之既舉於鄉不求仕進專意成就後學主講松泉檜陽兩書院從遊者甚衆榮密禹新諸名士率出其門後以覃恩誥封奉政大夫生平著作甚富遠近多傳錄之及歿門人於天仙廟前樹碑誌感子羣玉以舉人任濬縣教諭

張衛生 字延堂舉人博學能文設帳授徒成名者甚衆任光州學正獎勵人材能稱厥職襄辦河務遇事認真既歿門人樹碑誌其德

王毓甲 歲貢字冠乙苦志能文爲時名宿屢薦不售以設帳授經終其身行詣所學鄉黨稱頌焉

施春膏 字卹卿舉人由教諭過班任江蘇溧水知縣性深沈寡言笑爲文峭厲刻露

在溧水任內屢爲鄉試同考官

施春和 字茗齋舉人性警敏博聞強識文名噪一時兼精岐黃堪輿之學由國史館議叙知縣改教職司鐸滑縣旋以大挑二等授南陽教諭

王子麒 字公振歲貢才敏學優作文千言立就友教四方才俊多出其門子翰卿學生

張道生 子連理附 字立原廩貢篤志好學蜚聲畿序嘗主講官謝岐三保養塾多所成

就事母趙色養兼至弟幼弱撫養教誨情誼懇摯爲世所稱子連理字穗歧以廩貢保舉訓導品端學邃友教四方學者翕然宗之性孝友事親先意承志兄弟三人析居時田僅十畝悉與弟後兄歿姪幼不能自存又不時矜恤之其長厚類如此孫樹駿庠生

李本棠 字思卿拔貢候選教諭品端學邃坦白率真爲文汪洋恣肆暢所欲言教人

口講指畫摹擬逼肖晚年主講滎陽洞林書院成就尤多及歿門人樹碑以誌德教

郭廷璧 字瑞五歲貢隱居教授敦品勵行與陳光基諸先生齊名有四理學之稱尤

精醫理活人無算

裴藍田 字石川歲貢性耿介學問淵博教人因材善誘書法遒勁詩宗樂天著有閒

情偶吟集

徐哲 庠生品端學粹舌耕自給不妄取與論者謂有道學風

顧起龍 字少葛庠生篤學不倦敦尚古樸性孝謹母年近九旬冬月爲煖足溫被穢

褻之役皆身親之

司承斌 字雅堂恩貢品行方潔敏而好學爲文清真雅正設教四方類多成材析居

後每歲硯田所入分潤諸弟毫無町畦子芳增庠生

張益孜 字勉齋增生氣度安雅文品清健晚年絕意進取以詩酒自娛工書畫求者無虛日著有虎泉詩稿

鄭光斗 字劍堂由歲貢就職縣丞不仕性嚴毅動遵禮法常置孫夏峯湯文正二公文集於座右以資觀摩教人宗旨亦不外此家中男婦六十餘口分職授事悉無間言六世同居稱爲義門

傅履行 庠生行方履潔言笑不苟討論經典具有心得人多以理學目之

馮克立 字卓亭副貢任盧氏教諭旋陞彰德教授學問淵博生平恤孤憐才義舉尤多

張士衡 字仲權廩生篤孝友強記博聞以臬比終著有石洲文集二卷

錢述彭 字子振庠生博通經史操履端謹設教里塾多所成就

常自如

子茂仁附

字履坦歲貢經術湛深坐擁皋比門前履滿因守城功保六品銜以

訓導用子茂仁增生性沈敏爲文精深刻露著有中庸讀法暨引文直講探入中州
文獻孫其俊庠生

鄧品昂 字星樓歲貢性灑脫與人交無町畦爲文清麗典雅瀟灑出塵詩賦尤冠絕

一時鏖戰名場稱爲奪幟妙手教授新密間士人多所成就

錢緘三 字慎齋庠生博學能文設教里塾妙於講解又精韻學子紹塘庠生

徐乃昭 字鏡山歲貢才智警捷能文章善書法暮年設教多所成就

王巽生 字文杏庠生莊重寡言笑人皆敬之舌耕爲業後學資其陶成

樊其昌 字正卿廩生品端學優輕財好義教人不計脩金嘉惠寒士尤多

王鹿宴 字鶴秋歲貢性超脫文亦肖其爲人與人交有肝胆晚年失明人甚惜之

張鳳梧 增生學行冠一時設教鄉里士林矜式少時自塾歸有包裹遺於路後失主

尋問璧還之年九十餘而終

陳桂苑 歲貢敦品勵學工於啟迪沈酣經史置世事於不問人謂之書癡

丁家鶴 子維藩附 品學兼優久困名場設帳授徒有功後學及歿鄉里樹碑以誌欽佩

子維藩庠生持躬端謹尤善解紛難人以爲世濟其美云

周之楨 字幹亭優稟生性孝反學養深醇四方來學者絡繹不絕又明醫理多所拯
救

于青萍 字劍菴增生學問優長著有芸窗紀實二卷

錢謙吉 字卜六歲貢性豪爽待人不設城府爲文豪健俊偉書法尤擅絕一時

傅長卿 字仙橋副貢歷署光州濇縣教諭賦性純篤學問優長與人交開誠布公爲文清真雅正不染浮靡習氣在任時勤於其職士人皆愛慕之晚年設教鄉里多所成就子元勳庠生元杰舉人

孫雲騰 優廩生性方鯁心口如一有過輒面規之不屑與世浮沈教人循循善誘爲後學領袖

韓培梓 字靈木歲貢敏而好學博通古今家貧舌耕爲業敢迪後進不遺餘力尤篤內行家庭之內人無間言

姚鶴齡 字伴松廩貢耿介篤實不染浮華學憲邵提入明道書院以爲士林矜式民國成立舉勸學總董

盧瑞珍 字聘侯性恬退能文章以舉人大挑一等借補山東武城縣縣丞旋解組歸

專以成就後學爲己任矜平躁釋未嘗以氣凌人歷主檜陽書院士風丕振壽八十有四子廷贊仍親見四代次子廷襄庠生

靳鶴齡 字景仙舉人天資聰穎灑脫不羈書畫俱臻絕妙文亦典瞻高華嘗主講東里書院多所成就出考職籤分四川歷署定遠興文知縣後歿興文任所

周金相 字勵菴廩生衣冠望族也性恬淡爲文細膩熨貼詩賦亦韶秀絕倫設帳授徒成就多人

王荷誠 字笠若威貞格正孫家學淵源讀書能得間爲文沈摯刻露不落恒蹊旋以孝友公請褒揚 大總統頒給孝義之門匾額並授褒辭褒章此次修志充當採訪未觀厥成抱病以歿士論惜之

王鳳文 字修吾性耿介取與不苟文則江河奔流一瀉千里少年馳聲名場有文壇

健將之號惜命與時乖僅以明經終身與修邑乘未竟而卒

韓秉鈞 字國卿由優廩生考職籤分湖北巡檢天真爛熳語無斧飾爲文沈鬱頓挫
有古大家風金石碑銘多出其手中年遊幕四方爲當世名流所推許此次編纂邑
乘未竟病歿士論哀之

武功

明

劉

先

子廣孫傑附

字祖光少負大志有膽畧元末大亂募民兵以圖匡濟義旌所指

罔不克捷以功略陞平章政事封鄭國公元亡知天命有在洪武初率所部來歸從
鄂國公常遇春信國公湯和收河北諸郡西戡晉絳敗王保保兵復從丞相魏國公
徐達克陝西秦鳳環慶諸州已酉入覲授驍騎前衛指揮僉事明年復從征迤北調

驍騎左衛又調茶陵衛加授廣威將軍調征雲南所至身先士卒大小五十餘戰俘
馘甚衆雲南平置烏撒衛指揮使司陞爲指揮同知鎮之時治所新設洩事精勤撫
馭有力遠近悅服授懷遠將軍卒贈驃騎將軍左軍都督府都督僉事長子廣襲父
職義勇過人屢立戰功宣德三年總戎甘肅領符節佩平羌將軍印控制諸番大著
威望廣子傑襲甘州左衛指揮同知天順中於莊浪涼州等處屢立戰功生子晟晟
生經綸綸生勳俱襲本衛職

黃孟英 生而武勇累立戰功元至正間授武德將軍鎮守泗州萬戶府萬戶

張問明字濟附 字鑑空廩生超化人智力絕人饒有方畧明季闖賊蹂河南土寇峰起

鄉里謀所以禦難者推問明主其事捐貲築寨於超化募鄉勇守之遠近紳民聞而
歸者萬家登封土寇李際遇百計攻寨問明不動聲色擊却之義聲旣振闖賊亦懾

其威故十四年破密屠戮殆盡而邑南無恙問明之力也撫按以異相雄才文武兼資奏其功有旨准廩貢後總鎮慕其義勇資以參謀授參將衝鎮守密縣密人感其德者至今謳思不忘子四澍湖瀚濟皆名諸生濟字公注孝友謙和雖才勇過人未嘗以此自見後移居金花泉北里人熏其德凌競之風爲之一變雖鄉愚無知鮮有道其名字者疾革里人奔禱城隍廟願各減己算以延其壽其爲人所欽重如此

錢

煩

字查冲明周府儀賓有奇勇胆畧過人明末流寇擾密煩分守超化寨北面

賊畏之莫敢仰視時近村禾稼多被土寇搶掠煩左右巡視人得芸穫自如

丁仲章 字獻庭少負大志有智畧及長才勇過人闖賊犯密挺身格鬪殺賊甚多

鄭樂密 行二武藝絕倫里人呼爲二老虎崇禎末土寇李際遇之叔某奉際遇命抄

畧鄉村路經橋溝溝狹蓬蒿塞路馬不能成列魚貫而過樂密持鈎鎌鎗潛伏伺賊

賊魁李某至突起以鎗鉤其項而殺之斷其首而去後經賊巢爲賊所扼大叫曰雁
過留聲人過留名力戰死之

楊線匠 隸張鑑空門下善鎗法能削人之眉使人弗覺嘗與人戲賭持鎗登場往還
久之謂其人曰輸矣其人舉手捫之而眉已無土寇犯超化屢挫其鋒後大病新痊
與李際遇戰於河干適盔落髮遮面目自度不能脫遂以鎗自刺而死鑑空門下勇
士死於難者惟楊線匠一人餘皆善終 以上舊志

清

孫錦標 字捷三武生有膽畧擒匪擾河南杖策入伍剿賊汝魯間連戰皆捷七晝夜
眠食皆廢賊東遁圍許昌從張子青赴援解圍又連破賊壘捷報以外委把總賞藍
翎守備銜著寶豐汛外委旋補開封營把總

王廷蘭 字瑞庵廩貢有權畧擒匪至迫不及逃闔村大哭蘭率壯丁二十名以銃禦之殺人無數衆見賊勢猛皆奔匿隻身斬首十數級自分無生理伴仆地賊以刀刺其股不少動賊始去是役也蘭以智免闔村賴以保全後司鐸商水學憲奏保直隸州命下蘭已卒

王獻 字劍溪優廩生性豪爽不拘小節與兄連芳連增皆精拳術擒匪圍其村兄弟三人共出擊賊自辰至酉殺傷枕籍運增死之賊亦敗退闔村獲全

王思治 馬振清 二人師生也拳技過人喜雪不平道光朝中牟新鄭教匪起誣稱二人爲鷹揚將事聞上憲捕索遂赴省昭雪事得白並請以誅匪自効上憲壯之與卒二千辭曰匪衆烏合吾兩人能蕩之乘夜搗其巢獲渠魁以獻患遂平撫院嘉其功保守備職不受賜金亦不受遂以力田終

王孟賢 精拳棒擒匪犯密率村人避寇土洞中賊圍洞口拒戰終日身負重傷奪槩擊賊賊逸去村人得無恙

徐中葆 善鎗棒土匪陳泰安據風后頂聞其名欲迫入夥中葆不從率十餘人持械拒却之

段

鈞 子金聲附

咸豐間擒匪犯密鈞爲段溝寨主守禦有方卒保無虞同治間匪重

來民不及逃子金聲率衆扼要堵禦賊知有備遂去所全活者以千計後以守城功獎把總銜

吳 湘 字荊三歲貢博學能文友教四方爲士林所推重中年以後接辦公事精明強幹膽畧過人土匪陳泰安自禹竄密湘登高燃火以示有備次日追賊關口與登封隊勇協力堵禦鄉人得免於難

韓際雲 性慷慨族鄰有爭端善爲排解人服其公粵匪擾密招募丁壯屢獲劇賊邑侯爲之請獎未及而卒

王鳳翔 庠生有幹畧咸同間土匪擾境率丁壯防守屢挫賊鋒且於要害等處堆煤代藥虛張聲勢賊遂遁事聞於上賞給五品頂戴

方伎

清

王玉光 精青烏學爲邑訓術性友愛善解紛難

見舊志

郭永壽 字介眉密東名醫也方藥所投應手取效遠近受賜者每題額以匾其門子九經九皋均以醫名

劉壽三 善丹青梅尤擅長屢爲識者所賞

牛根 精奇門捻匪犯密至伊村根用水遁法置碗水於村首賊望之若湖遂去村人是以獲免

牛家順 精和緩術有邱姓者氣已絕順適至投以劑立甦其神妙多如此

王中立 善接捏推納術每療病應手取效有酬謝者輒却之年七十一再與鄉飲

馬東周 字夢初廩貢學問優長兼精醫術臨症施藥應手痊愈時以儒醫目之

王心一 性孝友博聞強識績學未售遂業醫遠近貧富皆應之病愈不受餽遺嘗著

驗方新集痘疹新集等書藏於家孫宇春庠生

傅履學 洞達醫理妙手絕倫人所不治之症往往一藥而愈當時推爲國手

楊永錫 子鼎三附 名醫也嘗著痘疹詳說十二卷傷寒摘要八卷楊氏醫案若干卷藏

於家子鼎三能世其業人皆稱爲楊七先生而不名嘗診一無疾人云汝於二年後

立秋日當不起後果如其言其神妙如此

周之官 性仁厚精岐黃術名重一時嘉慶間爲醫學訓科邑侯景甚尊禮之

傅觀象 庠生性孝因親病博覽醫書遂精醫有延之者無遠近悉應之活人無算不受謝嘗語人曰每療一症必悉心研究病不愈心不釋也用心如此可想見其爲人矣

張雲瑞 庠生讀書善悟性耽詩酒尤工丹青手蹟流傳賞鑒家咸愛重之著有對泉詩集行於世

張炳藩 廩生精醫術遠近爭聘之應手取效病愈無德色並不受謝及歿人皆惜之
白 暹 天姿靈敏行詣端方始業儒繼習醫臨症處方百發百中密新鄭榮之交爭延致之鄉里匾其門曰名齊良相

張春 弱冠遊庠因其先五世業醫舉業之暇每兼習之醫書涉獵殆盡遇人所不能治之症獨出手眼而於傷寒時疫尤爲擅長

王怡 名醫也尤精外科遇危險症施藥奏功往往出人意料有酬謝者力却之孫書堂書揚均能世其業

韓一鵬 字程萬庠生丰神灑落多材藝工書畫篆刻尤精求之者紙恒滿案隨手應付悉可人意卒年七十有九

申永平 工圖畫凡山水花卉鳥獸蟲魚之類各擅其長

陳心寬 儒醫也療病如神遠近咸依賴之

李元辰 精卜筮能知未來事遠近問卜者如市所斷決多奇驗壽九十有四

樊通潤 號雲鶴精岐黃術治病因症處方無不應手立愈著有醫學述要十卷藏於

家壽九十八無疾而卒

丁同文 太學生以醫名於傷寒瘟疫等症尤稱國手壽八十有七

李培壽 醫術高妙名重一方子咸如璋如孫紹白均世其業璋如尤稱國手

張允之 性靈敏精醫學一生活人無算

陳光常 精醫學兼內外兩科治療多痊愈者

流寓

漢

韓融 後漢書本傳董卓之亂潁川韓融將宗親千餘家避亂密西山中苟或謂父

老曰潁川四戰之地也天下有變常爲兵衝密雖小固不足以捍大難宜亟避之鄉人多懷土不能去

鍾皓 後漢書本傳字季明潁川長社人也爲郡著姓世善刑律少以篤行稱公府連辟爲二兄未仕避隱密山註密縣山也以詩律教授門徒千餘人

三國

楊俊 三國志本傳字季才河內獲嘉人也受學陳留邊讓讓器異之俊以兵亂方起而河內處四達之衢必爲戰場乃扶持老弱詣京密山間同行者百餘家俊振濟貧乏通其有無宗族知故爲人所略作奴僕者凡六家俊皆傾財贖之

晉

閻鼎 晉書本傳鼎字台臣天水人也初爲太傅東海王越參軍轉卷令行豫州刺史事屯許昌遭母喪乃於密縣間鳩聚流人數千欲還鄉里值京師失守秦王出奔密中司空荀藩藩弟司隸校尉組及中領軍華恒河南尹華蒼在密縣建立行臺以

密近賊南趨許穎司徒左長史劉疇在密爲塢主中書令李暉太傅參軍騶捷劉蔚
鎮軍長史周顛司馬李述皆來赴疇

荀 崧 晉書本傳泰始中詔以崧代兄襲父爵補濮陽王允文學與王敦顧榮陸機
等友善趙王倫引爲相國參軍倫篡稱護軍司馬給事中稍遷尙書吏部郎太弟中
庶子累遷侍中中護軍王彌入洛崧與百官奔於密未至而母亡賊追將及同旅散
走崧被髮從車守喪號泣賊至棄其母尸於地奪車而去崧四被創氣絕至夜方甦
葬母於密山

褚 粲 晉書本傳字謀遠陽翟人太傅裒之從父兄也父頽少知名早卒粲以才藝
楨幹稱襲封關內候補冠軍參軍於是長沙王又擅權成都河間阻兵於外粲知內
難方作乃棄官避地幽州後河北有寇難復還鄉里河南尹舉粲行本縣事及天下

鼎沸招合同心將圖過江先移住陽城界明年謀東下道阻不得進因留密縣司隸校尉荀組以爲參謀廣武將軍復領本縣督新城梁陽城三郡諸營事

唐

盧照鄰 唐書本傳照鄰病去官隱具茨山下手足攣廢乃著幽憂子十卷自以高宗時尙吏已獨儒武后尙法已獨黃老后封高山聘賢士已獨廢著五悲文今在集中自號幽憂子

宋

歐陽修 字永叔諡文忠廬陵人文章功業昭人耳目詳宋史本傳按文忠寓密當在熙寧四年以太子少師致仕後其中子棐曾知蔡州故卜居於密歟墓在邑東六十里旌賢鄉子孫世取一人爲奉祀生明鼎革禮祀幾廢知縣王珏訪知有裔孫復且

爲申請奉祀得以光復舊典云

晁冲之 具茨集序紹聖初被謫遂飄然棲遁於具茨之下號具茨先生

張晉卿 王圻稗史新鄭人宣和間進士有文名執政愛其才屢招之仕其妻丁氏文簡公五世孫也美而淑勸之曰外間時勢洶洶豈士大夫致身時乎張乃止相與偕隱大隗山未幾靖康之變寇有聞丁之美者遣數十騎劫之丁不從挾之上馬丁投地曰我寧死不辱也寇始亦不怒屢扶之丁大罵遂怒殺之

金

元好問 金史本傳字裕之號遺山秀容人登進士歷官尙書省左司員外郎河南密開國子由汴梁至密寄棲超化寺詩酒自娛後入嵩山集金源君臣遺言往行凡百餘萬言名曰野史

明

翁深 字臧若本姓閩名爾梅號古古浦人明鼎革遨遊海內嘗寓密之韶化有文集行世

趙御衆 字寬夫家溧州鼎革後携家來密居超化寨十載所交皆一時名公鴻儒每出遊必滿載書籍歸一覽成誦旋即棄去詩文書法皆精工學者寶之其子虞養字時占亦工書後終於郊

靳於中 字爾時尉氏人幼有至性博學善屬文萬歷進士衡文山左備兵遼東皆稱其職歷官工部尙書以養親告歸築別墅於大隗山所稱靳寨是也鑿池種竹揮翰賦詩與阮徵君漢聞相娛樂遂籍密焉子滋昂負奇質以聖賢爲可學弱冠悟性命大旨公喜曰爾超我一等矣山居日以存神養和爲事當流寇猖獗往來寨下戒莫

敢犯四方避兵者存活以數萬計著有庸行直義參同易測諸書行於世及卒閭里爲罷市門人私謚貞惠先生後十年土人思公父子之德復爲立祠至今祀之

阮漢聞 字太冲順天人能文章有經濟才明季見天下方亂絕意仕進後尋嗣宗派徙尉氏閉戶著述屢徵不出海內士大夫慕道從遊者日益衆因避囂隱於大隗山自號大隗山樵

楊思聖 字猶龍號大陸雪樵歷官河南布政司詩賦書法冠絕一時解組後寄居超化寨同友人登高臨水揮毫賦詩徜徉自得見者不知其爲本省大員也

韓原濬 字發之盧龍人家世貴顯簡澹寡交遊人無少長貴賤皆推誠與之鼎革後盡棄其田產携家隱大隗山臨終命子歸葬容城孫徵君奇逢爲誌銘有云謀不在食憂不在貧人以爲定論萊陽宋琬有韓隱君子傳子鼎業平生慕魯仲連田子春

之爲人讀書不事章句所交盡當世賢豪長者避地山居躬耕耨習勤苦屢如也嘗過大陽山見李崆峒先生慕爲盜所掘即裹糧率家僮改葬之海內知名之士莫不高其義

禹好善 字存誠原籍汜水別墅在密以進士歷任河間武昌兩府司李行取御史不避權倖章疏凡三百餘上悉關國是單騎經營漕運按山東直隸督修陵工賜紵金終掌京畿道以朝士多黨致仕歸遂籍於密明鼎革屢薦不起卒葬密南百栗溝父墓之左子甸副貢樸歷官禮科給事中堂登聞鼓事正色立朝抗直敢言有鴛鴦之風

溫源 字憲之蒲阪人仕至河南道監察御史以剛直忤時退隱於密之超化寨題所居曰白雲莊時與諸名流相倡酬題贈甚富里人稱爲雲莊先生

陳邇毅 字孔恕失其爵里錢佳選家塾師也嘗在大梁書肆間值所識當道者過呼之不應乃趨執其手曰何絕人太甚也亦不答當道囑書賈勿令引去移時步至肆間訪之書賈曰陳先生堅不可留去時遺詩一首當道取視慚沮而去其詩有云而今幾個奇男子留得三春不嫁人等語

蘇明彝 新鄭志字中倫新鄭人性敏毅弱冠廩於庠明季避亂密之五里店流寇鍾夢秋率衆攻寨明彝偕衆拒守俄寨破賊偉其材迫脅使從明彝不屈擁至紅沙河踞地大罵遂遇害

崔允豪 鄭州志字興文尉氏人性義俠八歲受劍術學射及孫吳韜畧嘗以劇孟郭解自許崇禎中李自成寇河南允豪奉母從靳司空阮太冲張林宗避地大隗山遇異人授以堪輿別傳周易秘旨其術屢試如神

清

王岱 字次峯里居無攷性高潔屏迹超化村諸名公題四皓圖多贊其事岱獨薄之作詩云豈爲商山芝已無故隨車馬入皇都一時俱別商山去羞見人間畫此圖又云人薺焉能食野雞興言四皓我心悲料爾山中千萬局總無一着是高棋其夷然不屑如此

仙釋

上古

大隗真人 莊子昔黃帝將見大隗乎具茨之山方明爲御昌寓驂乘張若謂朋前馬昆闡滑稽後車至於襄城之野七聖皆迷適遇牧馬童子問塗焉若知具茨之山乎曰然若知大隗之所存乎曰然黃帝曰異哉小童非徒知具茨之山又知大隗之所

存請問爲天下小童曰夫爲天下者亦若此而已矣又奚事焉予少而自遊於六合之內予適有瞽病有長者教予曰若乘日之車而遊於襄城之野今予病少痊予且復遊於六合之外夫爲天下者亦若此而已予又奚事焉黃帝曰夫爲天下者誠非吾子之事雖然請問爲天下小童辭黃帝又問小童曰夫爲天下者亦奚以異夫牧馬者哉亦去其害馬者而已黃帝再拜稽首稱大師而退

漢

上成公 後漢書密縣人也其初行而不還後歸語其家曰我已得仙因辭家而出舉步漸高良久乃沒陳寔韓韶同見其事

蘭公夫婦 名勝志邑人死化爲雙鶴飛去今岩下有石相偶形如雙鶴

卜成 四竹堂記異密縣有卜成者身遊九山之上放浪不拘之鄉山即鞏縣之九

山有廟碑晉永康二年立其文曰九山府君太華元子之碑

唐

田 穎 雁門人號拙翁天寶進士官拾遺後至尙書清乾隆間在汴省與錢九韶遇同遊春臺飲酒賦詩相得甚歡後遊嵩嶽寓九韶家之聽瀨山房爲作記作詩集序字說隨遊記等篇其餘題贈詩文字聯隨景撰寫各極其妙其隨遊記一篇尤奇詭見藝文志

風道士 雲遊海島吸風飲露不食五穀後入超化寺有鸞題度化碑記其事文多奇不可句讀

宋

信公和尚 仁宗披度僧也幼聰慧博聞善悟往往絕塵凡想弱冠遊東都偶從婁道

者講涅槃經即洞澈禪旨雖宿望老僧莫能難仁宗雅重之爲建聖壽寺於密遂祝髮焚修其中卒證聖果

元

仁公和尚 奉勅主超化寺通徹釋氏源流能詩

明

藻鑑禪師 假師人姓張法名道衡少業儒稍長讀釋氏書恍然有所覺遂投少林寺祝髮焉後雲遊於杭閱藏經見梵本心經云超化寺有佛舍利仍有金花靈源暗通西域阿耨達池因逃禪此寺不復出尤善風鑑每有品題無不中邑人尊仰之號藻鑑禪師

鐵佛寺老僧 名洪權號大畏密曲梁馬姓子生於萬歷間入鐵佛寺爲僧崇禎末其

母沒葬畢雲遊五嶽訖無定處清順治五年始歸寺常買物放生遇畜願亦未嘗以惡語相加每行必持鉢携錘遇白骨呪而埋之或盤膝端坐數日夜不火食康熙間端坐而化鼻珠下垂至足一手上握神氣如生其夕鄭之青龍寺小僧見其趨入佛殿又有遇之邑西者問其何往答以西去

清

元禧和尙 江南宜興縣人明禮部尙書董其昌四世孫也流寓超化寺樂其風土遂

披薙焉博通儒書長於堪輿

以上舊志

韓 湘 鞍口山巔有石洞內有石牀一座相傳湘嘗修真於此後仙去洞內石壁有字模糊不辨旁有塚人以爲其母葬處云

寂 元 超化寺僧博通儒釋諸書兼善琴棋脫去俗緣鄉里尊之同治末年卒

王子富 素奉道教心嚮儒術積香火資增修破敗好種樹古柏數十株皆親手植授徒廟中及門者數十人羽化後居民肖像祀之

梁元興 連環寨神洞中道士有異行能前知決人休咎多奇驗至旱澇豐凶則默而不洩嘉慶十八年歲大饑豫收糠粃儲滿屋人莫知其故及期不知所往居民賴以存活後復還值大疫流行元興沿門施治得無恙及歿村人立廟祀之

普 貴 聖水寺僧也性高雅琴棋書畫各擅其長而尤工畫葡萄邑侯王甚愛賞之嘗命畫葡萄數幅贈銀五十兩而去

黃理慶 城隍廟道士性和厚有才幹人有慶弔殷勤襄事悉鑒人意尤精外科施藥概不取值

寂 明 龍泉寺僧守法戒尤嗜儒書李定菴講學松泉書院名士雲集明亦與焉晚

年歸寺授徒孜孜不倦圓寂之日猶喃喃誦經不輟

卷

第

一

